

CYFARFOD	Cabinet Cyngor Gwynedd
DYDDIAD	28 Medi 2021
AELOD CABINET	Cynghorydd Cemlyn Rees Williams
SWYDDOG	Gwern ap Rhisiart
TEITL YR EITEM	Ysgol Abersoch

1. Y PENDERFYNIAD A GEISIR

Gofynnir i'r Cabinet ystyried y gwrthwynebiadau a dderbyniwyd yn ystod y cyfnod gwrthwynebu statudol, ynghyd â'r ymateb i'r gwrthwynebiadau hynny, a phenderfynu os dylid:

- i. Cadarnhau'n derfynol y cynnig a roddwyd drwy rybudd statudol, i gau Ysgol Abersoch ar 31 Rhagfyr 2021, a darparu lle i ddisgyblion yn Ysgol Sarn Bach o 1 Ionawr 2022, yn unol ag Adran 53 o'r Ddeddf Safonau a Threfniadaeth Ysgolion (Cymru) 2013 a gofynion y Côt Trefniadaeth Ysgolion 11/2018.

2. Y RHESWM DROS YR ANGEN AM BENDERFYNIAD

- 2.1 Pwrpas yr adroddiad hwn yw adrodd i'r Cabinet yn dilyn cynnal cyfnod gwrthwynebu statudol ar y cynnig a roddwyd drwy rybudd statudol i gau Ysgol Abersoch ar 31 Rhagfyr 2021, a darparu lle i ddisgyblion yn Ysgol Sarn Bach o 1 Ionawr 2022, gan ofyn iddynt gymeradwyo gweithredu'r cynnig yn derfynol. Cyhoeddwyd y Rhybudd Statudol ar y 25^{ain} o Fehefin 2021, gan gychwyn cyfnod gwrthwynebu o 28 diwrnod. Daeth y cyfnod gwrthwynebu i ben ar y 23^{ain} o Orffennaf 2021 a derbyniwyd 211 o wrthwynebiadau a 2 ddeiseb.

3. CYFLWYNIAD A CHEFNDIR

- 3.1 Yn eu cyfarfod ar 17 Medi 2019, bu i'r Cabinet gefnogi argymhelliad i gychwyn trafodaethau ffurfiol gyda chorff llywodraethol Ysgol Abersoch er mwyn ystyried opsiynau ar gyfer y ddarpariaeth addysgol yn y dalgylch i'r dyfodol. Daeth y penderfyniad yn sgil pryderon ynglŷn â lleihad yn niferoedd disgyblion yr ysgol. Mae niferoedd disgyblion yr ysgol wedi gostwng yn gyson ers 2016 ac yn fregus ers peth amser.
- 3.2 Yn dilyn cynnal y cyfarfodydd hyn, cyflwynwyd adroddiad i'r Cabinet ar 15 Medi 2020, lle cefnogwyd yr argymhelliad i ymgymryd â phroses ymgynghori statudol, yn unol â gofynion adran 48 o Ddeddf Safonau a Threfniadaeth Ysgolion (Cymru) 2013, ar y cynnig i gau Ysgol Abersoch ar 31 Awst 2021 a darparu lle i ddisgyblion yn Ysgol Sarn Bach ar 1 Medi 2021. Cadarnhawyd y penderfyniad gan y Cabinet yn eu cyfarfod ar 3 Tachwedd 2020, yn dilyn i'r penderfyniad gwreiddiol gael ei alw mewn a'i gyfeirio'n ôl i'r Cabinet gan y Pwyllgor Craffu Addysg ac Economi yn ei gyfarfod ar 8 Hydref 2020.
- 3.3 Roedd yr adroddiad a gyflwynwyd i'r Cabinet ar 15 Medi 2020 yn amlinellu'r prif heriau y mae'r ysgol yn eu hwynebu, yn benodol:
 - i. niferoedd yn yr ysgol yn peri pryder. Ym Medi 2020, roedd 8 disgybl llawn amser, a 2 ddisgybl meithrin.
 - ii. maint y dosbarthiadau yn fychan – gyda 10 disgybl yn cael eu dysgu mewn un dosbarth cymysg eu hoedran.
 - iii. rhagolygon yn dangos 10 o ddisgyblion yn 2021, 12 o ddisgyblion yn 2022, a 12 o ddisgyblion yn 2023.

- iv. data Medi 2020 yn dangos bod 26 disgybl yn byw yn nalgylch Abersoch gyda 21 ohonynt yn mynychu ysgolion eraill. Dengys hefyd bod 5 disgybl tu allan i ddalgylch Abersoch yn mynychu Ysgol Abersoch.
- v. Ysgol Abersoch yn derbyn swm ychwanegol i'r dyraniad arferol trwy'r polisi gwarchodaeth lleiafswm staffio (sy'n gwarantu o leiaf pennaeth ac athro ym mhob ysgol, a phennaeth a chymhorthydd mewn ysgolion sydd â llai na 15 o ddisgyblion). Cyfanswm y swm ychwanegol yma yn ystod y flwyddyn ariannol 2020/21 (yn seiliedig ar niferoedd Medi 2019) oedd £52,582.
- vi. Cost fesul disgybl Ysgol Abersoch yn y flwyddyn ariannol 2020/21 oedd £17,404, o gymharu â chyfartaledd Sirol cost y disgybl am yr un cyfnod o £4,198
- vii. Nifer o lefydd gweigion – mae 76% o lefydd gweigion yn yr ysgol (32 mewn nifer)

4. YR YMGYNGHORIAD STATUDOL

- 4.1 Yn unol â gofynion y Côt Trefniadaeth Ysgolion 11/2018, a Deddf Safonau a Threfniadaeth Ysgolion (Cymru) 2013, cynhaliwyd cyfnod ymgynghori statudol ar y cynnig gydag ymgynghorai perthnasol rhwng 12 Ionawr 2021 a 23 Chwefror 2021.
- 4.2 Lluniwyd dogfen ymgynghori statudol yn unol â gofynion ac arweiniad y Côt Trefniadaeth Ysgolion 011/2018 a dosbarthwyd copi electroneg o'r ddogfen i'r holl ymgynghorai perthnasol. Yn ogystal, anfonwyd copïau caled o'r holl ddogfennau yn unol â cheisiadau a dderbyniwyd gan ymgynghorai. Mae'r ddogfen ymgynghori a'r holl ddogfennau cefndir i'w gweld ar wefan y Cyngor www.gwynedd.llyw.cymru/moderneiddioaddysg.
- 4.3 Yn ystod y cyfnod ymgynghori, cynhaliodd swyddogion Cyngor Gwynedd sesiynau "galw heibio" rhithwir oedd wedi eu cynnal dros feddalwedd Microsoft Teams, lle anfonwyd gwahoddiadau i lywodraethwyr, staff addysgu ac ategol, rhieni/gwarchodwyr disgyblion Ysgol Abersoch ac unrhyw ran-ddeiliaid cymuned Llanengan oedd yn dymuno gofyn cwestiynau yn ymwneud â'r cynnig. Yn ystod y sesiynau roedd swyddogion o adrannau perthnasol ar gael i egluro ac ymateb i ymholiadau, a fyddai'n galluogi i'r unigolion gyfrannu tuag at yr ymgynghoriad. Mynychodd 7 o bobl y sesiynau galw heibio rhithwir.
- 4.4 Yn ogystal, crëwyd dogfen ymgynghorol i blant cynradd gydag holiaduron cysylltiedig. Trefnwyd bod hwylusydd annibynnol yn cynnal sesiynau rhithwir gyda'r 2 ysgol oedd yn rhan o'r ymgynghoriad er mwyn canfod barn y disgyblion ar y cynnig.
- 4.5 Derbyniwyd 154 ymateb i'r ymgynghoriad statudol oedd yn manylu ar y materion a ganlyn:
 - Gwrthwynebiadau i'r cynnig
 - Sylwadau am y broses statudol
 - Opsiynau amgen
 - Materion Addysgol
 - Materion Cyllidol
 - Asesiad yn erbyn y Ddeddf Llesiant
 - Ôl-ddefnydd Safle'r Ysgol
 - Ysgolion cyfagos
 - Cludiant a theithio
 - Y gymuned
 - Yr iaith Gymraeg
 - Cylch Meithrin a Ti a Fi Abersoch
 - Arall
- 4.6 Yn ogystal, derbyniwyd ymateb gan Estyn yn ystod y cyfnod ymgynghori oedd yn nodi bod y cynnig yn "debygol o gynnal o leiaf y safonau presennol o addysg gynradd yn yr ardal".
- 4.7 **Opsiynau amgen eraill a awgrymwyd yn ystod yr ymgynghoriad statudol**

- 4.7.1 Mae Côt Trefniadaeth Ysgolion 011/2018, yn nodi y gall ymgynghorai awgrymu opsiynau amgen eraill yn ogystal â sylwadau ar y cynnig penodol yn ystod yr ymgynghoriad.
- 4.7.2 Cynigwyd 5 opsiwn amgen arall yn ystod yr ymgynghoriad. (Roedd nifer o'r ymatebion yn awgrymu y dylid rhoi ystyriaeth bellach i'r opsiwn i ymestyn ystod oed yr ysgol i 3-9 oed yn ogystal). Serch hynny, yn dilyn gwerthuso'r opsiynau hyn yn erbyn ffactorau'r Strategaeth 'Addysg Gynradd o'r Ansawdd Gorau i Blant Gwynedd' (gan roi ystyriaeth i'r Côt Trefniadaeth Ysgolion 01/2018, ac ystyriaethau perthnasol eraill) daethpwyd i'r casgliad mai'r cynnig i gau Ysgol Abersoch a darparu lle i holl blant dalgylch Ysgol Abersoch yn Ysgol Sarn Bach oedd yn parhau yr opsiwn mwyaf priodol i ymateb i'r heriau sydd yn wynebu'r ysgol (am y rhesymau a nodwyd yn adran 4.1 a 4.7 o'r adroddiad ar yr ymgynghoriad www.gwynedd.llyw.cymru/moderneiddioaddysg).

4.8 Newid y dyddiad gweithredu

- 4.8.1 Er i'r ymgynghoriad gael ei gynnal ar y cynnig arfaethedig i gau Ysgol Abersoch ar 31 Awst 2021 a darparu lle i ddisgyblion yn Ysgol Sarn Bach o 1 Medi 2021, yn dilyn ystyried y sylwadau a dderbyniwyd o'r ymgynghoriad a oedd yn datgan pryder am yr amserlen amlinellol, argymhellwyd addasu'r dyddiad gweithredu. Ystyriwyd y byddai gohirio gweithredu tan 31 Rhagfyr 2021 yn caniatáu mwy o amser i'r Adran Addysg roi trefniadau yn eu lle er mwyn sicrhau trosglwyddiad esmwyth i ddisgyblion Ysgol Abersoch i Ysgol Sarn Bach.
- 4.8.2 Yn dilyn yr ymgynghoriad, adroddwyd yn ôl i Gabinet ar 15 Mehefin 2021, a bu i'r Cabinet ystyried adroddiad yr ymgynghoriad, y sylwadau a'r opsiynau amgen a dderbyniwyd yn ystod y cyfnod ymgynghori statudol, a phenderfynu:
- i. Cymeradwyo cyhoeddi cynnig statudol i gau Ysgol Abersoch ar 31 Rhagfyr 2021, a darparu lle i ddisgyblion yn Ysgol Sarn Bach o 1 Ionawr 2022.
 - ii. Cymeradwyo cyhoeddi rhybuddion statudol ar y cynnig yn (i) uchod yn unol â gofynion Adran 48 o Ddeddf Safonau a Threfniadaeth Ysgolion (Cymru) 2013.

5. CYFNOD GWRTHWYNEBU STATUDOL

- 5.1 Yn unol â phenderfyniad Cabinet 15 Mehefin 2021 cyhoeddwyd rhybudd statudol, yn unol â Deddf Safonau a Threfniadaeth Ysgolion 2013 a Chod Trefniadaeth Ysgolion 011/2018, gan gychwyn cyfnod gwrthwynebu statudol o 28 diwrnod rhwng 25 Mehefin a 23 Gorffennaf 2021.
- 5.2 Cyhoeddwyd y rhybudd statudol ar 25 Mehefin a'i osod ar giatau Ysgol Abersoch ac Ysgol Sarn Bach ac ar wefan y Cyngor www.gwynedd.llyw.cymru/moderneiddioaddysg . Dosbarthwyd copïau electroneg o'r rhybuddion yn unol â gofynion y Côt Trefniadaeth Ysgolion 011/2018, a bu i'r rhan-ddeiliaid perthnasol dderbyn e-bost gyda linc i'r wefan i'w hysbysu o'r cyfnod a threfn gwrthwynebu. Gwnaethpwyd yn glir yn y rhybudd bod modd i unrhyw un wrthwynebu a sut yr oedd modd gwneud hynny.
- 5.3 Daeth y cyfnod gwrthwynebu i ben ar 23 Gorffennaf 2021 a derbyniwyd 211 gwrthwynebiad a 2 ddeiseb. Yn dilyn y cyfnod gwrthwynebu, mae'n ofynnol i'r Cabinet ystyried adroddiad ffurfiol ar y gwrthwynebiadau a'r ymateb iddynt cyn gwneud penderfyniad terfynol i weithredu'r cynnig ai peidio. Mae **Atodiad A** yn cynnwys dadansoddiad o'r gwrthwynebiadau a dderbyniwyd ac ymateb y Cyngor i'r gwrthwynebiadau hynny.

6. GWRTHWYNEBIADAU A DDERBYNIWYD YN YSTOD Y CYFNOD GWRTHWYNEBU

Pwrpas y rhan hon o'r adroddiad yw cyflwyno crynodeb o'r gwrthwynebiadau a dderbyniwyd yn ystod y cyfnod gwrthwynebu ynghyd ag ymateb y Cyngor. Mae'r holl wrthwynebiadau a sylwadau gyda ymateb y Cyngor iddynt wedi eu nodi yn **Atodiad A** yr adroddiad hwn.

6.1 Y Gwrthwynebiadau

Gohebiaeth (Llythyr neu e-bost)	Deiseb	Cyfanswm
211	2 (1 Ar-lein + 1 Cyfeillion Ysgol Abersoch)	213

6.1.1 Derbyniwyd cyfanswm o 211 o wrthwynebiadau drwy gyfrwng e-bost neu lythyr. Mae'n werth nodi bod nifer o'r sylwadau a dderbyniwyd wedi eu cyflwyno yn ystod y cyfnod ymgynghori statudol ac wedi eu hail-gyflwyno fel rhan o'r cyfnod gwrthwynebu.

6.1.2 Yn ogystal â'r gwrthwynebiadau unig derbyniwyd 2 ddeiseb:

- Deiseb ar-lein gyda 1,884 wedi ei arwyddo yn datgan *“Agorwyd Ysgol Abersoch ym 1924. Yn anffodus, mae'r ysgol o dan fygythiad o gau. Mae'r staff yn angerddol iawn dros gadw'r ysgol hon ar agor ac i ddatlu ei chanmlwyddiant yn 2024! Mae'r ysgol wrth galon pentref Abersoch, Gogledd Cymru, ac yn agos iawn at galonnau holl ddisgyblion presennol, y gorffennol a'r dyfodol, y rhieni a'r bobl leol. Plis arwyddwch y ddeiseb hon i ddangos eich cefnogaeth i'r ysgol hon ac i atal ei chau. Plis arwyddwch i ddangos eich cefnogaeth i'r gymuned leol, plis!”*
- Deiseb gan Gyfeillion Ysgol Abersoch gyda 1,115 llofnod yn datgan *“Mae Cyngor Gwynedd yn ymgynghori ar gynnig i gau'r ysgol o 31 Awst 2021. Llofnodwch y deiseb hon i gefnogi Ysgol Abersoch, sy'n darparu addysg ragorol a sy'n hanfodol i ddiogelu'r iaith a diwylliant Cymraeg yng nghanol ein cymuned.”*

6.1.3 Yn dilyn dyddiad cau'r cyfnod gwrthwynebu dadansoddwyd y sylwadau gwrthwynebu a dderbyniwyd gan gynnig ymateb y Cyngor iddynt o dan y penawdau canlynol:

- Gwrthwynebiadau i'r cynnig heb sylw
- Y gymuned
- Materion addysgol
- Yr iaith Gymraeg
- Cylch Meithrin a Chylch Ti a Fi
- Sylwadau am y broses statudol
- Cludiant a theithio
- Effaith ar ddysgwyr
- Staff
- Ysgolion cyfagos
- Materion cyllidol
- Opsiynau amgen
- Deddf Llesiant
- Ôl-ddefnydd safle'r ysgol
- Dyddiad gweithredu'r cynnig
- Arall

6.1.4 Gellir gweld y dadansoddiad yn llawn yn **Atodiad A** ond rhoddir crynodeb o'r prif sylwadau gwrthwynebu a dderbyniwyd ynghyd ag ymateb y Cyngor iddynt isod.

6.2 Gwrthwynebiadau i'r cynnig heb sylwadau

6.2.1 Roedd 63 yn datgan gwrthwynebiad i'r cynnig yn unig heb gynnwys unrhyw sylw na rheswm pam e.e *“Rwy'n gwrthwynebu cau Ysgol Abersoch.”*, *“Dwi yn erbyn yr ysgol ma yn cau!!”* a *“Nad wyf yn cytuno y dylid cau'r ysgol hon ac rwy'n gwrthod unrhyw ymgais i'w chau lawr.”*

6.3 Y Gymuned

- 6.3.1 Roedd y prif sylwadau a godwyd yn ystod y cyfnod gwrthwynebu am effaith y cynnig ar y gymuned yn ymwneud â'r materion canlynol:
- **Yr ysgol ydi calon y pentref**
 - **Mae'r ysgol yn cefnogi bywyd pentref ac yn ran allweddol o'r pentref**
 - **Byddai cau'r ysgol yn cael effaith negyddol ar y pentref a'r iaith Gymraeg**
 - **Diffyg perthynas efo cymuned Ysgol Sarn Bach**
- 6.3.2 Mae'r Cyngor yn nodi'r sylwadau parthed pwysigrwydd yr ysgol ym mywyd pentref a chymuned Abersoch.
- 6.3.3 Wrth ddatblygu unrhyw gynigion yn ymwneud â moderneiddio addysg, rhaid rhoi ystyriaeth lawn i'r effaith bosibl ar y gymuned.
- 6.3.4 Fel rhan o'r broses ymgynghori, cwblhawyd asesiad o effaith cymunedol ar yr opsiynau a ystyriwyd er mwyn mesur yr effaith tebygol y byddai'r opsiynau yn eu cael ar y cymunedau dan sylw. Yn unol â gofynion Cod Trefniadaeth Ysgolion 011/2018, yn dilyn y cyfnod ymgynghori, cwblhawyd asesiad pellach o'r cynnig a phob un o'r opsiynau amgen a ystyriwyd. Gellir gweld copi o'r asesiad llawn ar wefan y Cyngor www.gwynedd.llyw.cymru/moderneiddioaddysg
- 6.3.5 Mae'r asesiad yn nodi y byddai cau Ysgol Abersoch yn effeithio ar rai elfennau o ddigwyddiadau cymunedol ac y byddai peth effaith negyddol yn deillio o gau'r ysgol. Fodd bynnag, nodir fod 9 (35%) o ddisgyblion meithrin – blwyddyn 3 sydd yn byw yn nalgylch Ysgol Abersoch eisoes yn mynychu Ysgol Sarn Bach. O ganlyniad, deuir i'r casgliad fod cyswllt rhwng yr ysgol amgen a'r ardal ehangach eisoes.
- 6.3.6 I liniaru unrhyw effaith negyddol posib ar y gymuned pe byddai'r cynnig yn cael ei wireddu, mae'r asesiad yn nodi pwysigrwydd sicrhau bod cymuned Abersoch yn cael ei chynnwys yng ngweithgarwch yr ysgol amgen, ac i annog cydweithio cymunedol rhwng yr ysgol amgen a chymuned Abersoch, lle'n briodol.
- 6.3.7 O ganlyniad, pe byddai'r cynnig yn cael ei weithredu, bydd yn ofynnol fel rhan o'r broses i annog trafodaethau rhwng yr ysgol amgen a rhieni disgyblion Ysgol Abersoch fel bod modd i rieni a disgyblion fanteisio ar eu cyfleusterau a gweithgareddau ar ôl ysgol, ac i annog yr ysgol amgen i fanteisio ar gyfleusterau cymuned Abersoch yn ogystal.

6.4 Materion Addysgol

Roedd y prif sylwadau a godwyd yn ystod y cyfnod gwrthwynebu yn ymwneud â'r materion canlynol:

- 6.4.1 **Niferoedd – derbyniwyd sylwadau a oedd yn datgan fod posibilrwydd y byddai niferoedd disgyblion Ysgol Abersoch yn gallu cynyddu i'r dyfodol**
- 6.4.2 Mae'r Awdurdod wedi blaenoriaethu Ysgol Abersoch ar gyfer adolygiad o'r ddarpariaeth addysgol oherwydd bod nifer o heriau yn ei hwynebu. Mae niferoedd disgyblion yr ysgol wedi gostwng yn gyson ers 2016 ac yn fregus ers peth amser.
- 6.4.3 O ganlyniad i'r niferoedd isel presennol, a bod rhagolygon yn rhagweld y bydd y niferoedd yn parhau'n isel yn Ysgol Abersoch am y pum mlynedd nesaf, mae'r ysgol mewn sefyllfa fregus ac o dan bwysau cyllidebol cynyddol.
- 6.4.4 Mae'r Cyngor yn nodi'r sylwadau, fodd bynnag, o ystyried maint y cynnydd yn nifer y disgyblion a ragwelir, mae'n debygol y bydd yr heriau sy'n wynebu Ysgol Abersoch yn parhau.

- 6.4.5 Er bod 2 ddisgybl meithrin a 3 disgybl derbyn wedi cychwyn ym mis Medi 2020, yn anffodus nid yw hyn wedi arwain at gynnydd sylweddol yn y niferoedd.
- 6.4.6 8 disgybl llawn amser, a 2 ddisgybl rhan amser oedd ar gofrestr yr ysgol ym mis Medi 2020, i gymharu â 2 ddisgybl rhan amser a 7 disgybl llawn amser ym mis Medi 2019.
- 6.4.7 O ganlyniad i'r niferoedd isel o ddisgyblion, mae nifer o lefydd gweigion yn Ysgol Abersoch (Derbyn – Bl.3) yn 26 (76%).
- 6.4.8 Nodir yn y Côt Trefniadaeth Ysgolion 011/2018 “Mae’n bwysig bod cyllid ar gyfer addysg yn gost-effeithiol. Dylai cyrff perthnasol ystyried y ffactorau canlynol mewn perthynas â’r adnoddau addysg: pa effaith y bydd cynigion yn ei chael ar nifer y lleoedd sydd dros ben yn yr ardal; Mae angen rhai lleoedd gwag fel y gall ysgolion ymdopi ag amrywiadau mewn niferoedd disgyblion, ond mae gormod o leoedd gwag, y gellid eu dileu, yn golygu bod adnoddau’n cael eu gwastraffu’n ddiangen.”
- 6.4.9 **Rhagamcanion - Derbyniwyd sylwadau oedd yn cwestiynu cywirdeb y rhagamcanion oedd wedi eu cynnwys yn y ddogfen ymgynghori gan awgrymu o bosib y bydda niferoedd yn cynyddu i’r dyfodol.**
- 6.4.10 Yn unol â gofynion y Côt Trefniadaeth Ysgolion 011/2018, gofynnir i’r cynigwyr nodi “rhagolygon pum mlynedd o’r disgyblion ar y gofrestr ymhob un o’r ysgolion presennol y mae’r cynigion yn debygol o effeithio arnynt, a hynny ar hyn o bryd (h.y. yn seiliedig ar y ffordd y mae ysgolion wedi’u trefnu ar hyn o bryd)”.
- 6.4.11 Crëwyd rhagolygon pum mlynedd y disgyblion drwy ddefnyddio gwybodaeth am dueddiadau’r gorffennol. Darperir rhagamcanion 3 blynedd gan benaethiaid yr ysgolion unigol a chyfrifir rhagamcanion blwyddyn 4 a 5 gan yr Awdurdod.
- 6.4.12 Cydnabyddir nad yw cyfrifo rhagamcanion yn wyddoniaeth, ac mae’n debygol y bydd y niferoedd yn amrywio ychydig mewn gwirionedd. Serch hynny, mae’r Adran Addysg o’r farn, ar sail y niferoedd Medi 2020, a chyfartaledd niferoedd derbyn y 3 mlynedd flaenorol, y bydd y niferoedd yn parhau’n isel yn Ysgol Abersoch y bum mlynedd nesaf:

Tabl 1 – Amcangyfrifon niferoedd Ysgol Abersoch

	M	D	1	2	3	4	5	6	Cyfanswm
Medi 2020	2	3	2	0	3	-	-	-	10
Amcangyfrif Medi 2021	3	2	3	2	0	-	-	-	10
Amcangyfrif Medi 2022	2	3	2	3	2	-	-	-	12
Amcangyfrif Medi 2023	2	2	3	2	3	-	-	-	12
Amcangyfrif Medi 2024	2	2	2	3	2	-	-	-	11
Amcangyfrif Medi 2025	2	2	2	2	3	-	-	-	11

- 6.4.13 Ym Medi 2020, o’r 26 disgybl (3-8 oed) oedd yn byw yn nalgylch Ysgol Abersoch, 5 o’r plant hynny oedd yn mynychu Ysgol Abersoch, gyda 21 (81%) ohonynt yn mynychu ysgolion tu allan i’r dalgylch. O ganlyniad, mewn ymateb i’r sylwadau sy’n nodi y bydd niferoedd a phoblogaeth plant yr ardal yn cynyddu dros yr 20-25 mlynedd nesaf, ar sail ffigurau Medi 2020, deuir i’r casgliad nad oes modd gwarantu y byddai’r plant hynny yn dewis mynychu Ysgol Abersoch.
- 6.4.14 **Maint dosbarthiadau – Roedd rhai ymatebion yn cwestiynu maint dosbarthiadau cymysg oedd yn bodoli yn Ysgol Sarn Bach. Nodwyd pryderon fod ysgolion cyfagos eisoes dros 20, sydd yn groes i Strategaeth yr Adran Addysg, ac y byddai gweithredu’r cynnig yn gwaethgu’r sefyllfa. Nodwyd y pryder y byddai’r cynnig yn golygu bod disgyblion yn cael eu haddysgu mewn dosbarthiadau gorllawn.**

- 6.4.15 Gyda 21 o lefydd gweigion, (a 4 lle gwag yn y Meithrin), mae gan Ysgol Sarn Bach gapasiti digonol ar gyfer disgyblion presennol Ysgol Abersoch ac Ysgol Sarn Bach, am y bum mlynedd nesaf.
- 6.4.16 Pe gwireddir y cynnig, rhagwelir y byddai 21 plentyn yn y Cyfnod Sylfaen a 37 yn CA2 yn Ysgol Sarn Bach. Byddai disgwyl i Bennaeth a Chorff Llywodraethol yr ysgol amgen roi sylw priodol i bennu maint dosbarthiadau addas ac adnoddau staff yr ysgol i ymateb i'r niferoedd diweddaraf. Byddai'r cynnydd yn eu cyllideb flynyddol yn hwyluso opsiynau i ystyried dosbarth/iadau a staff ychwanegol.
- 6.4.17 Yn unol â'r Côt Trefniadaeth Ysgolion 011/2018, yn achos cynnig i ad-drefnu ysgolion, roedd rhaid i'r ddogfen ymgynghori gynnwys manylion am yr holl ysgolion cyfagos y gellid ystyried yn rhesymol y bydd disgyblion yn dymuno trosglwyddo iddynt. O ganlyniad, roedd manylion Ysgol Sarn Bach, Ysgol Llanbedrog ac Ysgol Foel Gron wedi eu cynnwys yn y ddogfen yn ychwanegol i'r manylion am Ysgol Abersoch.
- 6.4.18 Pwysleisir mai'r cynnig a oedd yn destun i'r drefn statudol oedd cau Ysgol Abersoch a chynnig lle i ddisgyblion yn Ysgol Sarn Bach. Fel y nodir yn y ddogfen ymgynghori, *"Dim ond gydag Ysgol Abersoch ac Ysgol Sarn Bach y mae'r ymgynghoriad hwn yn ymwneud, felly dylai ymatebion i'r ymgynghoriad hwn gyfeirio at y cynnig ble y'i disgrifir ym mharagraff 1.1 uchod."* Ni ystyrir felly fod maint dosbarthiadau'r ysgolion cyfagos (Ysgol Foel Gron ac Ysgol Llanbedrog) yn berthnasol i'r cynnig.
- 6.4.19 Manteision ysgolion bach – derbyniwyd sylw yn awgrymu bod y ffaith fod Ysgol Abersoch gyda nifer isel o ddisgyblion wedi bod yn fanteisiol yn ystod cyfnod Covid-19**
- 6.4.20 Mae pob ysgol yng Ngwynedd wedi dilyn gweithdrefnau priodol o ran cadw disgyblion a staff yn ddiogel yn unol â chanllawiau Iechyd Cyhoeddus Cymru, Llywodraeth Cymru a'r Awdurdod.
- 6.4.21 Ansawdd yr addysg - roedd rhai sylwadau yn nodi bod yr addysg yn Ysgol Abersoch yn rhagorol. Roedd eraill o'r farn na fyddai'r cynnig yn cryfhau'r addysg, ac yn credu nad oedd y ddogfennaeth yn nodi llwyddiannau a chryfderau'r ysgol.**
- 6.4.22 Yn seiliedig ar ganlyniad yr asesiad o'r Effaith Tebygol ar Ansawdd a Safonau Addysg, daethpwyd i'r casgliad bod safon yr addysg a ddarperir yn Ysgol Sarn Bach ar yr un lefel â safon yr addysg yn Ysgol Abersoch. O ganlyniad felly, ni ragwelir y byddai unrhyw effaith negyddol o safbwynt ansawdd a safonau addysg yn deillio o'r cynnig i gau Ysgol Abersoch a throsglwyddo disgyblion i Ysgol Sarn Bach. Roedd yr wybodaeth yn yr asesiad yn dilyn arolygon diweddaraf Estyn yn yr ysgolion dan sylw ac yn nodi fod pob un o'r ysgolion wedi eu gosod mewn categori cyfatebol fan lleiaf i Ysgol Abersoch, a phob un o'r ysgolion wedi eu gosod yn y categori melyn, neu wyrdd o safbwynt categori cefnogaeth Llywodraeth Cymru.
- 6.4.23 Crynodeb o adroddiadau diweddaraf Estyn:

Ysgol	Blwyddyn yr archwiliad	Pa mor dda yw'r deilliannau?	Pa mor dda yw'r ddarpariaeth?	Pa mor dda yw'r arweinyddiaeth a rheolaeth?
Abersoch	Mehafin 2017	Da	Da	Da

* (Noder fod Estyn wedi cyflwyno 5 maes i'w harchwilio erbyn Hydref 2017).

Ysgol	Blwyddyn yr archwiliad	Safonau	Lles ac agweddau at ddysgu	Addysgu a phrofiadau dysgu	Safal, cymorth ac arweiniad	weinyddiaeth a rheolaeth
Sarn Bach	Hydref 2017	Da	Da	Da	Da	Da

- 6.4.24 Wrth gynnal asesiad o effaith tebygol y cynnig ar bum maes arolygu Estyn, yng nghyd-destun 'Arweinyddiaeth a Rheolaeth, nododd yr Awdurdod mai niwtral fyddai'r effaith tebygol o weithredu'r cynnig, yn sgil y ffaith bod Estyn wedi dyfarnu safon yr arweinyddiaeth yn Ysgol Abersoch ac Ysgol Sarn Bach gystal â'i gilydd.
- 6.4.25 Yn ogystal, nododd Estyn yn eu hymateb i'r ymgynghoriad statudol eu bod *"o'r farn bod y cynnig hwn yn debygol o gynnal o leiaf y safonau presennol o addysg gynradd yn yr ardal."*
- 6.4.26 Byddai gwireddu'r opsiwn hwn yn rhoi cyfleoedd i ddisgyblion gael eu haddysgu mewn grwpiau o gyfoedion sydd â llawer llai o amrediad oedran a chyfle i wella profiad addysgiadol a chymdeithasol y disgyblion, yn ddyddiol. Bydd anghenion unrhyw grwpiau agored i niwed, gan gynnwys plant ac anghenion dysgu ychwanegol, yn cael ei asesu a'i weithredu yn unol â pholisi a gweithdrefnau'r awdurdod. Manylir ymhellach ar ansawdd a safonau addysg yn Adran 7.2 o'r ddogfen ymgynghori a gweler yr asesiad llawn o'r effaith tebygol ar ansawdd a safonau addysg ar y wefan www.gwynedd.llyw.cymru/moderneiddioaddysg.

6.5 Yr Iaith Gymraeg

- 6.5.1 **Cafwyd nifer o sylwadau a oedd yn cyfeirio at ddylanwad yr ysgol ar iaith a diwylliant Abersoch ac o golli'r ysgol, byddai hynny'n cael effaith negyddol ar faint o Gymraeg fyddai'n cael ei siarad mewn amgylchiadau bob dydd ym mhentref Abersoch.**
- 6.5.2 **Cafwyd sylwadau a oedd yn nodi fod trigolion a busnesau Abersoch yn ymwybodol o fodolaeth y Gymraeg oherwydd yr holl waith a wna'r athrawon a'r disgyblion o'i hybu, gyda nifer o siopau yn arddangos arwyddion dwyieithog yn sgil hynny.**
- 6.5.3 Mewn ymateb i'r sylwadau hyn, cydnabyddir ymdrechion Ysgol Abersoch i ddatblygu sgiliau dwyieithog y dysgwyr yn ogystal â hyrwyddo pwysigrwydd y Gymraeg a'r diwylliant Cymreig yn ehangach yn y gymuned, gan gyfleu gwerthfawrogiad o gefnogaeth y gymuned i'r ysgol ac i'r iaith Gymraeg yn sgil hynny. Mewn ymateb i'r sylwadau, nodwyd fod y Cyngor hefyd yn cydnabod y pryderon ynglŷn â'r effaith posib ar yr iaith Gymraeg. Er hynny, disgwyliad yr Awdurdod yw bod holl ysgolion cynradd y sir yn cefnogi ac yn gwella'r defnydd o'r Gymraeg fel cyfrwng addysg ac iaith gymdeithasol disgyblion, gan mai'r un yw'r disgwyliadau ieithyddol ar gyfer holl ysgolion cynradd Gwynedd.
- 6.5.4 Er mwyn lliniaru unrhyw effaith negyddol posib ar y gymuned pe byddai'r cynnig yn cael ei wireddu, mae'r asesiad o ardrawiad ieithyddol yn nodi pwysigrwydd sicrhau fod cymuned Abersoch yn cael ei chynnwys yng ngweithgarwch yr ysgol amgen, ac i annog cydweithio cymunedol rhwng yr ysgol amgen a chymuned Abersoch, lle'n briodol. Yn ogystal, nododd y Cyngor fod yr asesiad effaith ar y gymuned yn nodi y rhagwelir y byddai peth effaith negyddol yn deillio o gau'r ysgol. Fodd bynnag, nodir fod 9 (35%) o ddisgyblion Meithrin – Bl. 3 sydd yn byw yn nalgylch Ysgol Abersoch eisoes yn mynychu Ysgol Sarn Bach, o ganlyniad, deuir i'r casgliad fod cyswllt rhwng yr ysgol a'r ardal ehangach eisoes.
- 6.5.5 **Cafwyd cyfeiriadau hefyd at lwyddiant Ysgol Abersoch i ennill gwobr aur y Siarter Iaith am ei hymdrechion i hybu defnydd cymdeithasol o'r Gymraeg, gan felly wireddu un o brif flaenoriaethau'r Cyngor, ynghyd â Llywodraeth Cymru.**
- 6.5.6 Cydnabyddir fod Ysgol Abersoch wedi gweithio'n galed i ddatblygu sgiliau dwyieithog y dysgwyr yn ogystal â hyrwyddo pwysigrwydd y diwylliant Cymraeg a bod yr ysgol wedi ennill gwobr aur y Siarter Iaith Gymraeg yn 2019. Mae'n hollbwysig felly bod y cynnig arfaethedig yn cydnabod yr angen i gefnogi a pharhau â'r gwaith hwn.

6.5.7 Cyfeiria nifer o'r ymatebwyr yn benodol hefyd at ddyhead uchelgeisiol Llywodraeth Cymru o hybu addysg cyfrwng Cymraeg a defnydd o'r Gymraeg yn y gweithle, er mwyn cyrraedd y nod o filiwn o siaradwyr Cymraeg erbyn 2050, a bod y cynnig o gau'r ysgol yn mynd yn groes i'r nod cenedlaethol hwn.

6.5.8 Mewn ymateb i'r sylwadau, nodwyd fod y Cyngor yn y ddogfen ymgynghori wedi nodi bod unrhyw drafodaethau yn ymwneud ag ad-drefnu angen cydnabod ymdrech Llywodraeth Cymru i gyrraedd y nod o filiwn o siaradwyr Cymraeg erbyn 2050. Nodwyd yn ogystal fod y Cyngor yn cydnabod y pryderon ynglŷn â'r effaith posib ar yr iaith Gymraeg ac wedi cwblhau asesiad o ardrawiad ieithyddol ar y cynnig i gau Ysgol Abersoch ac addysgu'r disgyblion yn Ysgol Sarn Bach. Yn yr asesiad, deuir i gasgliad na ragwelir effaith negyddol ar yr iaith Gymraeg pe byddai'r cynnig yn cael ei weithredu, a hynny'n bennaf yn sgil disgwyliadau'r Polisi Iaith, felly'r un fyddai'r ddarpariaeth i'r disgyblion waeth pa ysgol y byddent yn dewis mynychu. At hyn, fe ymddengys fod sefyllfa ieithyddol Ysgol Sarn Bach yn gryf, gyda 57% o ddisgyblion yr ysgol yn dod o gartrefi Cymraeg, o gymharu â 33% o ddisgyblion Ysgol Abersoch sy'n dod o gartrefi Cymraeg.

6.6 Cylch Meithrin Ti a Fi

6.6.1 Teimlwyd fod yr ysgol yn gynaliadwy oherwydd effaith y Cylch Meithrin a Chylch Ti a Fi.

6.6.2 Mae'r Awdurdod yn cydnabod dylanwad Cylchoedd Ti a Fi a Chylchoedd Meithrin ar niferoedd disgyblion mewn ysgolion ble y'i lleolir. Fodd bynnag, yn achos Ysgol Abersoch, o ystyried maint y cynnydd fyddai'n deillio o'r Cylch Meithrin, mae'n debygol bydd yr heriau sy'n wynebu Ysgol Abersoch yn parhau.

6.6.3 Mae'r rhagamcanion oedd yn y ddogfen ymgynghori wedi ei seilio ar ragamcanion 3 blynedd a gyflwynwyd gan benaethiaid yr ysgolion. Amcangyfrif y rhagamcanion 5 mlynedd ar sail cyfartaledd niferoedd derbyn yr ysgol dros y tair blynedd ddiwethaf. Yn sgil hynny, mae'r Adran Addysg o'r farn, ar sail y niferoedd Medi 2020, a chyfartaledd niferoedd derbyn y 3 mlynedd flaenorol, y bydd y niferoedd yn parhau'n isel yn Ysgol Abersoch am y bum mlynedd nesaf:

Tabl 1 – Amcangyfrifon niferoedd Ysgol Abersoch

	M	D	1	2	3	4	5	6	Cyfanswm
Medi 2020	2	3	2	0	3	-	-	-	10
Amcangyfrif Medi 2021	3	2	3	2	0	-	-	-	10
Amcangyfrif Medi 2022	2	3	2	3	2	-	-	-	12
Amcangyfrif Medi 2023	2	2	3	2	3	-	-	-	12
Amcangyfrif Medi 2024	2	2	2	3	2	-	-	-	11
Amcangyfrif Medi 2025	2	2	2	2	3	-	-	-	11

6.6.4 Dylid nodi fod y rhagamcanion uchod wedi eu cyfrifo ar sail niferoedd yn y mis Medi yn dilyn sefydlu'r Cylch Meithrin.

6.6.5 At hyn, ym Medi 2020, o'r 26 disgybl (3-8 oed) sy'n byw yn nalgylch Ysgol Abersoch, 5 o'r plant hynny oedd yn mynychu Ysgol Abersoch, gyda 21 (81%) ohonynt yn mynychu ysgolion tu allan i'r dalgylch. O ganlyniad, mewn ymateb i'r sylwadau sy'n nodi y bydd niferoedd a phoblogaeth plant yr ardal yn cynyddu dros yr 20-25 mlynedd nesaf, ar sail ffigyrau Medi 2020 a thueddiadau blaenorol, deuir i'r casgliad nad oes modd gwarantu y byddai'r plant hynny yn dewis mynychu Ysgol Abersoch.

6.6.6 Fel gwelir yn y tabl uchod, rydym yn nodi rhagamcan o gynnydd o 2 yn y niferoedd erbyn Medi 2022. Er mwyn i unrhyw opsiwn ymateb i'r heriau sy'n wynebu'r ysgol, byddai'n rhaid i'r cynnydd yn y niferoedd fod yn sylweddol. Nid yw'r Awdurdod o'r farn bod cynnydd o 2 ddisgybl yn gynnydd digonol i gyfarch heriau'r ysgol.

6.6.7 Dyfodol y Cylch Meithrin - roedd nifer o'r sylwadau yn nodi pryderon ynglŷn â dyfodol y Cylch Meithrin a Chylch Ti a Fi yn Abersoch pe byddai'r cynnig yn cael ei weithredu ac y dylai'r Cyngor fod wedi cychwyn trafod opsiynau ar gyfer ei ddyfodol cyn rŵan.

6.6.8 Mewn ymateb i'r sylwadau, nodir nad ydi cau'r Cylch Meithrin yn rhan o'r cynnig sydd dan ystyriaeth a bod y Cyngor yn awyddus i weld parhad y Cylch yn Abersoch. Fe nodir yn yr asesiad effaith cymunedol "*Cynhelir Cylch Meithrin a Chylch Ti a Fi yn adeilad yr ysgol. Pe byddai penderfyniad i gau'r ysgol, byddai rhaid ystyried opsiynau ar gyfer ôl-ddefnydd yr ysgol, gan gymryd i ystyriaeth y gweithgareddau sy'n cael eu cynnal yn yr ysgol ar hyn o bryd.*"

6.6.9 Pe byddai'r cynnig yn mynd yn ei flaen, mae'r Cyngor yn awyddus i drafod y posibiladau efo'r cynrychiolwyr perthnasol – gallai'r posibiladau gynnwys aros yn y lleoliad presennol, ail-leoli i'r ysgol amgen, neu symud i safle arall ym mhentref Abersoch.

6.6.10 Byddai trafod y posibiladau hyn gyda'r Cylch cyn i'r Cabinet wneud y penderfyniad terfynol ar ddyfodol Ysgol Abersoch, wedi bod yn gynamserol ac wedi creu risg y bydda'r Cyngor yn cael ei weld yn rhagfarnu'r broses.

6.7 Y Broses Statudol

6.7.1 Derbyniwyd nifer o sylwadau yn nodi anfodlonrwydd â'r penderfyniad i gynnal yr ymgynghoriad, yn benodol o safbwynt y cyfyngiadau yn sgil Covid-19. Yn ogystal, roedd rhai ymatebion yn datgan anfodlonrwydd â'r penderfyniad i gynnal cyfarfodydd rhithwir yn hytrach na chyfarfodydd cyhoeddus.

6.7.2 Mae'r Adran Addysg yn hyderus fod y broses ymgynghori statudol a gynhaliwyd yn cydymffurfio â gofynion a chanllawiau'r Côt Trefniadaeth Ysgolion 011/2018. Fel rhan o'r ymgynghoriad statudol:

- Cyhoeddwyd dogfen ymgynghori, a'r dogfennau cefndirol perthnasol, ar ffurf copi electroneg ar wefan y Cyngor (gyda copïau caled ar gael ar gais)
- Dosbarthwyd copïau electroneg o'r ddogfen i'r rhan-ddeiliaid perthnasol
- Derbyniwyd sylwadau/ymatebion ysgrifenedig drwy'r post ac e-bost.

6.7.3 Nid yw'r Côt yn gosod gofyniad i gynnal cyfarfodydd cyhoeddus/ymgynghori. Yn hytrach, fe nodir yn y Côt "gall cynigwyr ddefnyddio ffyrdd eraill o ymgysylltu ag ymgynghoreion, fel sy'n briodol yn eu barn hwy".

6.7.4 Mewn ymgynghoriadau blaenorol, mae'r Adran Addysg wedi cynnal sesiynau "galw heibio" er mwyn trafod y cynnig arfaethedig gyda rhieni, llywodraethwyr a staff yr ysgol dan sylw. Yn sgil cyfyngiadau Covid-19, nid oedd yn bosib cynnal y sesiynau "galw heibio" yn yr un modd. Serch hynny, er mwyn sicrhau bod rhan-ddeiliaid Ysgol Abersoch yn derbyn yr un cyfle i gael gwybodaeth, holi am eglurhad a chyflwyno sylwadau, cynhaliwyd sesiynau "galw heibio" dros gyfrwng meddalwedd cyfarfodydd rhithiol. Gosodwyd uchafswm o 3 ar gyfer pob sesiwn rhithwir er mwyn sicrhau fod pawb sy'n mynychu yn elwa ar drafodaeth gynhwysfawr a theg. Cynigiwyd 9 sesiwn dros 4 noson, a mynychodd 7 o bobl y sesiynau galw heibio rhithwir.

6.7.5 Yn ychwanegol i hynny, rhoddwyd cyfle i ran-ddeiliaid gyflwyno cwestiynau ynglŷn â'r cynnig drwy e-bost i'r Adran Addysg.

6.7.6 Cydymdeimlir â'r pryderon o gynnal ymgynghoriad yn ystod y pandemig, serch hynny, pwysleisir na allwn fel awdurdod ymrwymo i beidio ag ymdrin â'r ysgol am gyfnod amhenodol. Yn ychwanegol i hynny, bu i Lywodraeth Cymru gyhoeddi hysbysiad ar 8 Ionawr 2021 er mwyn caniatáu i gynigion ynghylch trefniadaeth ysgolion barhau, lle nad yw pob ysgol ar agor.

- 6.7.7 Credir fod niferoedd y sylwadau a dderbyniwyd i'r ymgynghoriad yn dystiolaeth nad oedd ei gynnal yn ystod cyfnod Covid-19 wedi amharu'n ormodol ar allu'r ymgynghoreion i gymryd rhan.
- 6.7.8 Bu i rai ymatebwyr nodi anfodlonrwydd â'r broses o ymgynghori gyda phlant a phobl ifanc.**
- 6.7.9 Yn unol â'r Côt Trefniadaeth Ysgolion 011/2018, mae'n ofynnol fel rhan o unrhyw ymgynghoriad statudol i gynnal ymgynghoriad gyda phlant a phobl ifanc yr ysgolion sy'n destun yr ymgynghoriad er mwyn darganfod eu teimladau am y cynnig.
- 6.7.10 Cynhaliwyd sesiynau ymgynghori rhithwir gyda chynrychiolaeth o ddisgyblion cynradd oedd yn destun yr ymgynghoriad. Trefnwyd bod hwylusydd annibynnol yn cynnal sesiynau rhithwir ag ysgolion oedd yn rhan o'r ymgynghoriad er mwyn canfod barn y disgyblion.
- 6.7.11 Fel rhan o'r ymgynghoriad gyda phlant a phobl ifanc, paratowyd dogfennau priodol ar gyfer disgyblion Ysgol Abersoch a Chyngor Ysgol Sarn Bach, a threfnwyd bod hwylusydd yn cynnal 3 chyfarfod dros y we (Google Meet) gyda'r ddwy ysgol i drafod y cynnig gyda'r plant er mwyn sicrhau eu bod yn deall yr hyn oedd yn cael ei gynnig ac er mwyn rhoi cyfle iddynt ddatgan barn am y cynnig. Roedd rhieni Ysgol Abersoch yn bresennol ac anogwyd hwy gan yr hwylusydd i siarad ar ran eu plant er mwyn cryfhau'r broses o gasglu barn y plant am yr effaith posib arnynt pe byddai'r ysgol yn cau.
- 6.7.12 Roedd pob sesiwn yn cymryd tri chwarter awr i awr i'w gwblhau a rhannwyd y disgyblion yn dri grŵp, Disgyblion Blwyddyn 3 Ysgol Abersoch, disgyblion y Cyfnod Sylfaen Ysgol Abersoch a Chyngor Ysgol Sarn Bach. Roedd y sesiwn yn cynnwys esbonio'r cynnig a rhoi cyfle i ddisgyblion fynegi eu meddyliau a'u teimladau.
- 6.7.13 Cafwyd rhai sylwadau oedd yn nodi'r farn bod yr asesiadau effaith a'r manylion a nodwyd yn y ffurflen ymateb yn annigonol.**
- 6.7.14 Fel rhan o'r broses statudol, wrth ddatblygu cynnig/cynigion ar gyfer ad-drefnu ysgolion, mae'n rhaid i'r Awdurdod gynnal asesiadau yn unol â Chod Trefniadaeth Ysgolion 011/2018. Rydym o'r farn bod yr asesiadau a gyflwynwyd fel rhan o'r ymgynghoriad yn cyd-fynd â chanllawiau cenedlaethol Llywodraeth Cymru ar gyfer ad-drefnu ysgolion. Yn yr un modd, mae'r Awdurdod yn hyderus fod ein prosesau a'r ffurflen ymateb yn cyfarch gofynion y Côt.
- 6.7.15 Derbyniwyd gwrthwynebiadau oedd yn nodi nad oedd y Cylch Meithrin wedi eu cynnwys yn y broses ymgynghori.**
- 6.7.16 Bu i ni dderbyn ymateb gan y Mudiad Ysgolion Meithrin a gan Gylch Meithrin Abersoch fel rhan o'r ymgynghoriad. Yn anffodus, yn dilyn dyddiad cau'r ymgynghoriad fe ddaeth i'r amlwg nad oedd cynrychiolwyr y Cylch Meithrin wedi derbyn copi o'r e-bost i'w hysbysu am yr ymgynghoriad statudol. Fel y nodir yn y ddogfen ymgynghori, roeddem wedi cynnwys y cylch fel ymgynghorai yn y rhestr dosbarthu ar gyfer rhannu'r wybodaeth am yr ymgynghoriad, ond fe ymddengys bod cyfeiriad e-bost y Cylch wedi ei sillafu'n anghywir ac felly ni dderbyniwyd y wybodaeth. Hoffem ymddiheuro am y camgymeriad yma.
- 6.7.17 Er mwyn sicrhau bod cynrychiolwyr y Cylch Meithrin yn cael cyfle i ystyried y ddogfen ymgynghori yn unol â'r amserlen a roddir yn y Côt Trefniadaeth 011/2018, rhoddwyd cyfle i'r Cylch anfon unrhyw sylwadau pellach atom erbyn 1yp dydd Mercher 21 Ebrill 2021. Ni dderbyniwyd ymateb pellach gan gynrychiolwyr y Cylch yn ystod y cyfnod ymgynghori estynedig.

6.7.18 Bu i rai nodi fod gwallau yn y ddogfen ymgynghori, a bod hynny'n tansailio'u hyder yn yr ymgynghoriad.

6.7.19 Mae'r Cyngor yn hyderus yng nghywirdeb yr wybodaeth a gyflwynwyd yn y ddogfen ymgynghori. Mae'r Cyngor yn derbyn fod lleoliad Ysgol Sarn Bach ar fap yn y ddogfen yn anghywir ond na wnaeth hyn effeithio'r ymgynghoriad.

6.7.20 Derbyniwyd sylwadau yn honni fod y penderfyniad wedi ei wneud ac nad oedd y Cyngor wedi talu digon o sylw i'r sylwadau a dderbyniwyd gan rhanddeiliaid yn ystod yr ymgynghoriad statudol

6.7.21 Mewn ymateb i'r sylwadau fod y penderfyniad eisoes wedi ei wneud, pwysleisir fod ymgynghoriad ar y cynnig arfaethedig i gau Ysgol Abersoch a chynnig lle i ddisgyblion yn Ysgol Sarn Bach wedi ei gynnal rhwng 12 Ionawr a 23 o Chwefror 2021 ac, yn unol â gofynion y Côt Trefniadaeth Ysgolion 011/2018, yn dilyn yr ymgynghoriad statudol, cyflwynwyd adroddiad ar yr ymgynghoriad i'r Cabinet er mwyn crynhoi'r materion a godwyd gan yr ymgynghorai a nodi ymateb y Cyngor i'r materion hynny. Yn dilyn ystyried yr adroddiad cynhwysfawr hwn bu i'r Cabinet ganiatáu rhyddhau rhybudd statudol ar y cynnig gan gynnal cyfnod gwrthwynebu er mwyn rhoi cyfle i unrhyw un wrthwynebu'r cynnig. Mae'r adroddiad hwn yn nodi'r gwrthwynebiadau a chynnig ymateb y Cyngor iddynt er mwyn i'r Cabinet eu hystyried a gwneud penderfyniad terfynol ar ddyfodol Ysgol Abersoch. Credir fod y camau hyn yn dystiolaeth glir nad ydi'r penderfyniad wedi ei wneud ac fod prosesau'r awdurdod yn sicrhau fod sylw teg yn cael ei roi i sylwadau a gwrthwynebiadau rhan-ddeiliaid cyn gwneud penderfyniad.

6.7.22 Derbyniwyd sylwadau yn holi pam na gyhoeddwyd un ymateb i'r ymgynghoriad statudol yn yr adroddiad Cabinet ar 15 Mehefin 2021

6.7.23 Roedd yna un ymateb a dderbyniwyd oedd yn cyfeirio at drefniadau a safon cyflwyniad a roddwyd mewn cyfarfod ymgysylltu (Panel Adolygu Ysgol) a gynhaliwyd gyda rhan-ddeiliaid Ysgol Abersoch gan nodi pryderon am ddiffyg cynwysoldeb gan nad oedd posib i bawb ddilyn y cyflwyniad.

6.7.24 Gan nad oedd rhan yma o'r ymateb yn ymwneud yn uniongyrchol â'r cynnig, ac yn cynnwys gwybodaeth bersonol awdur y sylwad yn ogystal ag unigolyn arall oedd yn bresennol yn y cyfarfod, teimlwyd ni fyddai'n briodol cyhoeddi'r ymateb yn llawn. Oherwydd hyn penderfynwyd ymateb i'r mater a'r gwyn dan sylw drwy gysylltu yn uniongyrchol gyda'r unigolyn gan nodi:

"Gallwn gadarnhau bod rhan o'ch ymateb wedi ei olygu oherwydd ei fod yn cynnwys gwybodaeth bersonol ac fe'i hystyriwyd yn gŵyn ynglŷn â threfniadau cyfarfod penodol a gynhaliwyd cyn yr ymgynghoriad statudol ac nad oedd y sylwadau a godwyd mewn perthynas â'r ymgynghoriad ei hun.

Teimlwyd mai'r modd priodol o ymateb i'r mater penodol hwn oedd anfon yr ymateb atoch chi yn uniongyrchol. Hoffwn, felly, ymddiheuro'n ddiwyll bod fformat ein cyfarfodydd wedi peri pryder i chi. Mewn ymateb i'ch pryderon, wrth drefnu cyfarfodydd yn y dyfodol, rhoir sylw penodol i fformat y cyflwyniadau, ac fe'ch sicrhawn y bydd gwahoddiadau i'r cyfarfodydd yn cynnwys cynnig i'r cyfranogwyr i nodi unrhyw ofynion pellach."

6.7.25 Cyhoeddwyd gweddill y llythyr, gan ymateb i'r pwyntiau perthnasol eraill, fel rhan o'r adroddiad a gyflwynwyd i'r Cabinet ar 15 Mehefin 2021.

6.8 Cludiant a Theithio

6.8.1 Roedd rhai sylwadau yn nodi pa mor gyfleus yw Ysgol Abersoch gan fod posib cerdded i'r ysgol a byddai mynd a phlant i Ysgol Sarn Bach yn anghyfleus i rieni. Roedd eraill yn nodi pryderon am yr effaith posib ar drefniadau teithio i'r ysgol, gan amlygu fod y llwybr cerdded o Ysgol Abersoch i Ysgol Sarn Bach yn beryglus.

- 6.8.2 Mae Strategaeth Cyngor Gwynedd ar gyfer addysg gynradd yn anelu at gyfyngu teithio o'r cartref i'r ysgol i daith un ffordd sydd heb fod yn fwy na 30 munud. Mae cludiant ar gael am ddim ar gyfer disgyblion ysgol gynradd sydd yn byw 2 filltir neu fwy o'r ysgol yn eu dalgylch.
- 6.8.3 Wrth symud i'r ysgol amgen, ni ragwelir y bydd angen i unrhyw ddisgybl deithio pellter afresymol i gyrraedd safle addysgol, yn unol â'r strategaeth. Mae Ysgol Abersoch wedi ei lleoli 1.4 milltir o safle presennol Ysgol Sarn Bach a rhagwelir y byddai'r daith oddeutu 5 munud bob ffordd mewn car neu fws.
- 6.8.4 Yn unol â Pholisi Cludiant Cyngor Gwynedd, disgwylir i ddysgwyr sy'n derbyn addysg gynradd neu uwchradd (ac eithrio dysgwyr ag anghenion dysgu ychwanegol neu anableddau), gerdded hyd at 2 filltir i gwrdd ag unrhyw gludiant a ddarperir gan Gyngor Gwynedd ar hyd y llwybr byrraf.
- 6.8.5 Gan fod y llwybr o Abersoch i Ysgol Sarn Bach yn cael ei hystyried fel un peryglus, byddai cludiant yn cael ei ddarparu yn unol â Pholisi Cludiant ysgolion y Sir.
- 6.8.6 Gofynnwyd am eglurder ynglŷn â'r cynnydd yn y costau cludiant pe gweithredir y cynnig, a sut y cyfrifwyd amcan gostau cludiant.**
- 6.8.7 Mae bws ysgol gynradd eisoes yn rhedeg rhwng Abersoch ac Ysgol Sarn Bach, a rhagwelir y byddai digon o seddi gweigion ar gyfer disgyblion presennol Ysgol Abersoch - felly ni ragwelir costau cludiant ychwanegol yn deillio o weithredu'r cynnig arfaethedig.
- 6.8.8. Serch hynny, fel y nodir yn y ddogfen ymgynghori, pe byddai angen darparu cludiant i holl ddisgyblion dalgylch Ysgol Abersoch, gan gynnwys y disgyblion sydd eisoes yn mynychu Ysgol Sarn Bach, yna byddai angen addasu trefniadau cludiant cyfredol Ysgol Sarn Bach.
- 6.8.9 Y gost bresennol o gludo disgyblion o Abersoch i Ysgol Sarn Bach yw £16,500. Pe byddai angen addasu'r trefniadau presennol, amcangyfrifir y byddai angen bws 49 sedd, a rhagwelir y byddai darparu cludiant ar gyfer holl ddisgyblion Derbyn i Flwyddyn 6 y dalgylch yn costio £30,500. Byddai hyn felly yn arwain at gost uwch o £14,000.
- 6.8.10 Roedd rhai sylwadau yn nodi y byddai'r cynnig yn cael effaith ar yr amgylchedd gan y byddai angen teithio ymhellach i'r ysgol**
- 6.8.11 Gan fod bws eisoes yn cludo plant cyfnod allweddol 2 o Abersoch i Ysgol Sarn Bach, ac ein bod yn rhagweld bydd digon o le ar y bws hwnnw (neu un mwy) ar gyfer plant dalgylch Ysgol Abersoch, ni ragwelir y bydd cynnydd yn allyriadau CO2.
- 6.8.12 Gofynnwyd faint o blant fydd angen cludiant i Ysgol Sarn Bach**
- 6.8.13 Os gweithredir y cynnig, byddwn yn trefnu arolwg gyda rhieni/gwarcheidwaid plant sy'n dymuno trosglwyddo i Ysgol Sarn Bach er mwyn canfod faint o ddisgyblion fydd angen cludiant am ddim o Abersoch. Bydd hyn yn rhoi niferoedd pendant i'r Awdurdod benderfynu a fydd angen bws mwy ai peidio.
- 6.8.14 Gofynnwyd faint o ddisgyblion sy'n manteisio ar y cynllun seddi gweigion, ac os yw'r disgyblion rheiny yn talu am y cludiant yn unol â'r polisi.**
- 6.8.15 Fel rhan o'r Cynllun Seddi Gwag, mae'r Cyngor yn fodlon ystyried ceisiadau gan ddysgwyr sy'n mynychu ysgol (neu safle ysgol) heblaw ysgol (neu safle ysgol y dalgylch) ar gyfer manteisio ar unrhyw seddi gwag ar gerbydau cytundeb trwy dalu ffi gyfredol tu allan i'r dalgylch. Mae manteisio ar y cynllun yn amodol ar:

- Bod seddi gwag ar gael
- Nid oedd angen i'r cerbyd wyro oddi ar ei daith arferol
- Dim costau ychwanegol i'r Cyngor
- Dalu'r ffi gyfredol am seddi gwag.

6.8.16 Byddai'r holl ddysgwyr a wnaeth gais am gludiant wedi talu am gynllun sedd wag i deithio ar y bws ysgol ddynodedig. Mae rhwng 3 a 6 o ddysgwyr wedi manteisio ar y cynllun hwn ers 2017.

6.8.17 Nodwyd anfodlonrwydd am y diffyg cynnig o gludiant i ddisgyblion oed meithrin.

6.8.18 Yn unol â Pholisi Cludiant Gwynedd, cyfrifoldeb rhieni yw gwneud trefniadau cludiant ar gyfer disgyblion oedran meithrin.

6.9 Effaith ar ddysgwyr

6.9.1 Derbyniwyd sylwadau y byddai plant yn dioddef pe bai Ysgol Abersoch yn cau gan y byddai'n rhaid iddynt ddechrau eto mewn ysgol newydd.

6.9.2 Mewn ymateb i'r sylwadau hyn, mae'r Awdurdod yn cydnabod fod y cyfnod yma yn un o ansicrwydd a allai arwain at straen ac effaith ar ddysgwyr. Fodd bynnag, pe gweithredir y cynnig, byddai'r Awdurdod yn gwneud pob ymdrech i gynorthwyo'r dysgwyr i drosglwyddo a setlo yn eu hysgol newydd.

6.9.3 Mae'r Cyngor o'r farn y byddai'r opsiwn o gau Ysgol Abersoch a chynnig lle i ddisgyblion yn Ysgol Sarn Bach yn arwain at:

- Leihau niferoedd llefydd gweigion o fewn yr ysgolion
- Cynnig profiadau i ddisgyblion i gymdeithasu a chydweithio yn ddyddiol gyda chyfoedion
- Addysgu'r plant mewn dosbarthiadau o faint mwy addas
- Lleihau'r amrediad o lwfans y pen ar gyfer holl ddisgyblion y Sir
- Sicrhau bod plant yn trosglwyddo un waith yn ystod eu haddysg gynradd ac uwchradd yn hytrach na dwywaith

6.9.4 Yn ogystal, mae'r ysgol amgen yn cynnig addysg o ansawdd cyfatebol fan lleiaf, gan gynnig mwy o brofiadau i'r disgyblion gydweithio a chymdeithasu gyda'u cyfoedion, ac yn galluogi'r disgyblion i fanteisio ar ystod o brofiadau cwricwlaidd ac allgyrsiol.

6.10 Effaith ar staff

6.10.1 Derbyniwyd gwrthwynebiad a oedd yn holi beth fyddai'n digwydd i staff yr ysgol pe byddai penderfyniad i weithredu'r cynnig

6.10.2 Pe byddai'r cynnig i gau Ysgol Abersoch yn cael ei weithredu, rhagwelir y bydd goblygiadau staffio yn arwain at ddiswyddiadau gan y byddai'r swyddi yn dod i ben pan fyddai'r ysgol yn cau. Ymgynghorwyd yn benodol â staff a chynrychiolwyr yr Undebau fel rhan o'r cyfnod ymgynghori statudol. Bydd rhaid i unrhyw ddiswyddiadau sy'n deillio o'r cynnig gydymffurfio â'r gyfraith cyflogaeth berthnasol a chynllun Diswyddo Gwynedd. Bydd cyfathrebu eglur ac agored gyda staff yn chwarae rhan greiddiol wrth weithredu ar unrhyw gynnig.

6.10.3 Yn ystod yr ymgynghoriad, cynhaliwyd sesiynau galw heibio rhithwir lle'r oedd posib trefnu i swyddogion o wasanaeth Adnoddau Dynol y Cyngor fod yn bresennol os oedd unrhyw aelod o staff yn dymuno trafod eu

sefyllfa. Rhoddwyd gwybod fod croeso hefyd i staff gysylltu â'r gwasanaeth Adnoddau Dynol yn uniongyrchol os oeddent yn dymuno cael trafodaethau un i un. Cynigir pecyn cymorth, gan gynnwys hyfforddiant os yw'n briodol, i'r holl staff a effeithir arnynt gan y cynnig.

6.10.4 Yn ddarostyngedig ar benderfyniad Cabinet, bydd y Gwasanaeth Adnoddau Dynol yn dilyn prosesau penodol gyda staff yr ysgol yn unol â chyfraith cyflogaeth.

6.11 Ysgolion cyfagos

6.11.1 Derbyniwyd nifer o wrthwynebiadau yn nodi fod Ysgol Llanbedrog dros ei capasiti.

6.11.2 Mewn ymateb i'r sylwadau hyn, nodir fod Cyngor Gwynedd yn gweithredu yn unol â Pholisi Mynediad Ysgolion y Sir. Mae'r polisi mynediad yn cyd-fynd â gofynion y Côd Derbyn i Ysgolion, Llywodraeth Cymru.

6.11.3 Nid yw'r Awdurdod o'r farn bod sefyllfa niferoedd Ysgol Llanbedrog yn berthnasol i'r cynnig i gau Ysgol Abersoch a chynnig lle i'r disgyblion yn Ysgol Sarn Bach.

6.11.4 Derbyniwyd gwrthwynebiad oedd yn cwestiynu os oedd digon o le yn Ysgol Sarn Bach ar gyfer plant Abersoch.

6.11.5 Gyda 21 o lefydd gweigion, (a 4 lle gwag yn y Meithrin), mae gan Ysgol San Bach gapasiti digonol ar gyfer disgyblion presennol Ysgol Abersoch ac Ysgol Sarn Bach, am y pum mlynedd nesaf.

6.11.6 Cyfeiriodd un neu ddau at effaith adeiladu estyniad yn Ysgol Llanbedrog ar addysg y disgyblion.

6.11.7 Mewn ymateb i hyn eglurwyd nad oes bwriad rhoi estyniad ar Ysgol Llanbedrog fel rhan o'r cynnig a oedd yn destun yr ymgynghoriad. Er eglurder, y cynnig arfaethedig yw cau Ysgol Abersoch, a chynnig lle i'r disgyblion yn Ysgol Sarn Bach.

6.11.8 Nodwyd gan un gwrthwynebwr fod cynlluniau ar y gweill i ddarparu tai newydd ar safle Pwyliaid Penrhos fydd yn creu rhwng 70-100 uned dros y 3-4 blynedd nesaf a chwestiynwyd doethineb cau Ysgol Abersoch gan na fyddai lle iddynt yn Ysgol Llanbedrog.

6.11.9 Mewn ymateb i'r gwrthwynebiad, nodir fod safle Pwyliaid Penrhos yn syrthio o fewn dalgylch Ysgol Gynradd Llanbedrog felly byddai unrhyw blant yn y tai newydd yn cael cynnig lle yn yr ysgol honno.

6.12 Materion Cyllidol

6.12.1 Roedd sawl gwrthwynebydd yn teimlo bod y cynnig yn canolbwyntio gormod ar feini prawf ariannol.

6.12.2 Pwysleisir na benderfynwyd ar y cynnig i gau Ysgol Abersoch ar sail materion cyllidol yn unig.

6.12.3 Mae'r ysgol wedi ei blaenoriaethu ar gyfer adolygiad o'r ddarpariaeth addysgol oherwydd bod nifer o heriau yn ei hwynebu. Mae niferoedd disgyblion yr ysgol wedi gostwng yn gyson ers 2016 ac yn fregus ers peth amser. O ganlyniad, mae'n debygol felly bod yr ysgol yn wynebu heriau cynyddol, gan gynnwys:

- Niferoedd disgyblion isel: Yn Medi 2020, roedd 8 disgybl llawn amser, a 2 ddisgybl meithrin wedi eu cofrestru yn yr ysgol.
- Rhagamcanion niferoedd: Rhagwelir y bydd y niferoedd yn parhau yn isel dros y blynyddoedd nesaf (Medi 2021 = 10; Medi 2022 = 12; Medi 2023 = 12.)

- Canran uchel o lefydd gweigion: Yn seiliedig ar ffigyrau Medi 2020, mae oddeutu 76% o lefydd gweigion yn yr ysgol (26 mewn nifer) (D-BI.3)
- Maint dosbarthiadau bychain: Mae'r 10 disgybl yn cael eu dysgu mewn un dosbarth cymysg eu hoedran.
- Amrediad oedran eang o fewn dosbarthiadau: Addysgir y disgyblion mewn un dosbarth gydag amrediad oed hyd at 5 mlynedd (3-8 oed).
- Annedd disgyblion: Dengys data 2020 fod 26 o ddisgyblion 3-8 oed yn byw yn nalgylch Ysgol Abersoch gyda 21 (81%) ohonynt yn mynychu ysgolion tu allan i'r dalgylch.

6.12.4 Derbyniwyd sylw fod cost yn ôl y disgybl yn gysyniad ffaeledig. Fel arfer, mewn ysgol fach lle bo niferoedd yn amrywio o flwyddyn i flwyddyn, bydd y gost ddamcaniaethol yn ôl disgybl yn mynd i fyny ac i lawr yn gyfatebol, ond bydd yr arian real sy'n cael ei wario yn aros yr un fath.

6.12.5 Oherwydd niferoedd disgyblion isel mae Ysgol Abersoch wedi bod yn derbyn swm ychwanegol i'r dyraniad arferol trwy'r polisi gwarchodaeth lleiafswm staffio (sy'n gwarantu o leiaf pennaeth ac athro ym mhob ysgol, a phennaeth a chymhorthydd mewn ysgolion sydd â llai na 15 o ddisgyblion) ers rhai blyneddoddedd.

6.12.6 Oherwydd hyn roedd cost y disgybl yn Ysgol Abersoch yn y flwyddyn ariannol 2020/21 yn £17,404 sy'n swm sylweddol uwch na chyfartaledd sirol ar gyfer cost fesul disgybl ar gyfer yr un flwyddyn o £4,198.

6.12.7 Mae rhagolygon yn awgrymu y bydd niferoedd isel yn parhau a'n golygu bydd yr angen am gyllid ychwanegol hefyd yn parhau.

6.12.8 Derbyniwyd cais am eglurder ar sut y cyfrifwyd yr amcan arbedion

6.12.9 Roedd dyraniad 2020/21 Ysgol Abersoch yn £137,140, ac mi fyddai trosglwyddo disgyblion Ysgol Abersoch yn golygu dyraniad ychwanegol i Ysgol Sarn Bach o £27,078. O'r gweddill o £110,062 bydd costau cludiant ychwanegol posib o £14,000, mae hyn yn gadael arbedion tebygol o £96,062.

6.12.10 Gofynnwyd a yw'r costau diswyddo, ymgynghoriad a chynnal a chadw wedi eu cynnwys yn yr amcangyfrif hwnnw.

6.12.11 Nid yw'r ffigyrau yn cymryd unrhyw gostau cynnal a chadw ar safle Ysgol Abersoch nac Ysgol Sarn Bach i ystyriaeth. Pe byddwn wedi ystyried y costau hyn mi fyddai'n golygu mwy o arbedion gan na fydda unrhyw gostau cynnal a chadw i Ysgol Abersoch i'r dyfodol.

6.12.12 Bydd unrhyw gostau diswyddo yn cael eu hariannu o'r arbedion hyn.

6.12.13 Nid yw costau'r ymgynghoriad wedi'u cynnwys wrth gyfrifo arbedion gan eu bod yn annibynnol o gostau rhedeg gwirioneddol yr ysgolion dan sylw.

6.12.14 Gofynnwyd, pe byddai'r cynnig yn mynd yn ei flaen, a fyddai angen adnodd ychwanegol ar Ysgol Sarn Bach, ac a fyddai plant yn cael grant gwisg ysgol?

6.12.15 Mae gan Ysgol Sarn Bach wisg ysgol swyddogol ac mae'r ysgol yn annog pawb i'w gwisgo. Mae disgwyliad ar rieni disgyblion blwyddyn 3 brynu wisg ysgol wrth iddynt drosglwyddo i Ysgol Sarn Bach beth bynnag. Gall plant sydd yn trosglwyddo o Ysgol Abersoch barhau i wisgo ei wisg (Ysgol Abersoch) hyd at ddiwedd blwyddyn 3 os mai dyma ddymuniad y rhieni.

6.13 Opsiynau Amgen

6.13.1 Derbyniwyd gwrthwynebiadau yn gofyn i'r Cyngor oedi'r broses a rhoi cyfle i'r ysgol gynyddu'r niferoedd a rhoi cyfle i'r Cylch Meithrin ffynnu.

6.13.2 Mewn ymateb i'r gwrthwynebiadau hyn, nodir na allwn fel awdurdod ymrwymo i beidio ymdrin â'r ysgol am gyfnod amhenodol. Mae niferoedd y disgyblion yn Ysgol Abersoch wedi gostwng yn gyson ers 2016 ac yn fregus ers peth amser. Mae'r Awdurdod o'r farn na fyddai parhau â'r ddarpariaeth addysg bresennol yn opsiwn hyfyw ar gyfer y dyfodol. Mae'r Adran Addysg o'r farn nad yw'n ymarferol parhau â'r sefyllfa bresennol yn bennaf oherwydd:

- Dosbarthiadau bychan iawn.
- Niferoedd isel a diffyg profiadau o gymdeithasu a chydweithio yn ddyddiol gyda chyfoedion ar gyfer y disgyblion.
- Rhagamcanion ar gyfer y dyfodol yn dangos y bydd niferoedd yn parhau'n isel dros y 5 mlynedd nesaf, gyda 11 disgybl yn mynychu erbyn 2025.

6.13.3 Mae'r Cyngor yn ymwybodol fod Cylch Meithrin a Chylch Ti a Fi wedi agor ar safle'r ysgol ym mis Chwefror 2020. Serch hynny, ac er yn cydnabod yr effaith gadarnhaol bosib gall lleoli Cylch Meithrin ar safle Ysgol Abersoch ei gael ar niferoedd, nid oes modd gwarantu y byddai'n arwain at gynnydd sylweddol yn y niferoedd, a rhagwelir y byddai heriau'r ysgol yn parhau.

6.13.4 Yn ychwanegol, nodir fod Ysgol Abersoch eisoes yn derbyn cyllid ychwanegol i'r dyraniad arferol trwy'r polisi lleiafswm staffio (sy'n gwarantu o leiaf pennaeth ac athro ym mhob ysgol, a phennaeth a chymhorthydd mewn ysgolion sydd â llai na 15 o ddisgyblion llawn amser). Cyfanswm y cyllid ychwanegol hwn ar gyfer y flwyddyn ariannol 2020-21 (yn seiliedig ar niferoedd Medi 2019) yw £52,582. Cost fesul disgybl yn Ysgol Abersoch yw £17,404 (2020-21), gyda chyfartaledd sirol cost fesul disgybl o £4,198.

6.13.5 Nid yw hwn yn gynaliadwy yn y tymor hir oherwydd bod rhagamcanion niferoedd yn parhau yn isel ac o ganlyniad byddai'r heriau cyllidol yn parhau.

6.13.6 Fel nodwyd yn ystod y broses ymgynghori, bu i'r Awdurdod ystyried 10 opsiwn gwahanol yn dilyn trafodaethau gydag Ysgol Abersoch. Ni ragwelir y byddai caniatáu mwy o amser i wneud gwaith pellach yn cynnig unrhyw ddatrysiad i'r heriau sy'n wynebu'r ysgol.

6.13.7 Roedd rhai yn gofyn pam na ystyriwyd opsiynau o newid oedran i 3-9 ar gyfer dyfodol yr ysgol

6.13.8 Mewn unrhyw drefn fel hon, mae'n allweddol rhoi ystyriaeth fanwl a phwyso a mesur manteision ac anfanteision unrhyw fodel a dyna geir yn y Gwerthusiad Opsiynau (www.gwynedd.llyw.cymru/moderneiddioaddysg)

6.13.9 Fel y nodwyd yn y ddogfen ymgynghori ac yna yn yr adroddiad ar yr ymgynghoriad yr opsiwn a ffafriwyd yn lleol oedd yr opsiwn i ymestyn ystod oed yr ysgol i 3-9 oed, gan gynnwys datblygiad y cylch meithrin. Ffafriwyd yr opsiwn yma'n lleol am resymau ymarferol megis gwell defnydd o'r gofod gwag yn adeilad yr ysgol gan ddarparu lleoliad ar gyfer y Cylch Meithrin, ac i liniaru'r effaith bosib allasai'r newid ei gael ar niferoedd Ysgol Sarn Bach (yr ysgol sydd yn darparu addysg i ddisgyblion 9-11 oed ardal Ysgol Abersoch).

6.13.10 Diystyriwyd yr opsiwn 3-9 oed am y rhesymau a ganlyn:

- Ni ragwelir y byddai ychwanegu un flwyddyn addysgol yn arwain at gynnydd digonol yn y niferoedd. O ganlyniad, byddai'r heriau sy'n wynebu'r ysgol yn parhau.
- Ni fyddai'r ystod oed yn gyson gyda mwyafrif ysgolion cynradd y sir.

- Ni fyddai'n caniatáu i'r ysgol gynnig darpariaeth CA2 cyflawn. Byddai'r disgyblion yn parhau i drosglwyddo i Ysgol Sarn Bach er mwyn cwblhau eu haddysg gynradd.

6.13.11 Ym mis Medi 2020, roedd holl ddisgyblion Ysgol Abersoch (Meithrin i Bl.3) yn cael eu haddysgu mewn un dosbarth gyda 10 disgybl. Cyfartaledd maint dosbarthiadau Ysgol Sarn Bach yn Medi 2020 oedd 24.

6.13.12 Dengys y tabl isod maint dosbarthiadau Ysgol Abersoch ac Ysgol Sarn Bach yn Medi 2020.

Ysgol	Meithrin	Derbyn	Bl 1	Bl 2	Bl 3	Bl 4	Bl 5	Bl 6	Cyfanswm	Nifer y dosbarthiadau	Dosbarth mwyaf	Dosbarth Beiaf	Maint dosbarth ar gyfartaledd
Abersoch	2	3	2	-	3	-	-	-	10	1	10	10	10
Sarn Bach	3	2	5	4	8	5	10	11	48	2	34	14	24

Ffynhonnell: Cyfrifiad Medi 2020

6.13.13 Byddai gwireddu'r cynnig arfaethedig yn golygu fod disgyblion Ysgol Abersoch yn cael eu haddysgu mewn dosbarthiadau mwy hyfyw, a gyda mwy o blant o'r un grŵp oedran.

6.13.14 Gyda 21 o lefydd gweigion, (a 4 lle gwag yn y Meithrin), mae gan Ysgol Sarn Bach gapasiti digonol ar gyfer disgyblion presennol Ysgol Abersoch ac Ysgol Sarn Bach, am y bum mlynedd nesaf.

6.13.15 Os gweithredir y cynnig, disgwylir y bydd Corff Llywodraethol Ysgol Sarn Bach yn rhoi sylw priodol i bennu maint dosbarthiadau a dosbarthiad adnoddau staff yr ysgol.

6.13.16 Yn dilyn ystyriaeth, daethpwyd i'r casgliad na fyddai'r opsiwn ymestyn ystod oed yr ysgol i 3-9 oed yn ddatrysiad cynaliadwy i'r dyfodol ar gyfer yr ysgol. Ni ragwelir y byddai ychwanegu un flwyddyn addysgol yn arwain at gynydd digonol yn y niferoedd. O ganlyniad, byddai'r heriau sy'n wynebu'r ysgol yn parhau. Rhagwelir y byddai niferoedd a'r rhagamcanion yn parhau'n isel, dosbarthiadau yn parhau'n fychain, ac ystod oedran eang o fewn dosbarthiadau yn parhau.

6.13.17 Roedd rhai yn gofyn pam na ystyriwyd opsiynau o ffederaleiddio ar gyfer dyfodol yr ysgol.

6.13.18 Mewn unrhyw drefn fel hon, mae'n allweddol rhoi ystyriaeth fanwl a phwyso a mesur manteision ac anfanteision unrhyw fodel, a dyna geir yn y Gwerthusiad Opsiynau (www.gwynedd.llyw.cymru/moderneiddioaddysg)

6.13.19 Trafodwyd ac ystyriwyd 3 fersiwn gwahanol o'r opsiwn ffederaleiddio fel rhan o'r ymgynghoriad statudol. Yn ogystal, awgrymwyd yn ystod yr ymgynghoriad y dylid rhoi ystyriaeth i 2 fersiwn pellach o'r opsiwn, sef:

- Ffederasiwn Ysgol Abersoch, Ysgol Llanbedrog, Ysgol Sarn Bach a threfniant cydweithio hefo Ysgol Foel Gron
- Ffederasiwn Enlli (Ysgolion Abersoch, Llanbedrog, Sarn Bach, Pont Y Gof, Crud y Werin, Uwchradd Botwnnog a threfniant cydweithio hefo Ysgol Foel Gron)

6.13.20 Bu i swyddogion yr Adran Addysg gwrdd â phennaeth a chadeirydd llywodraethwyr Ysgol Sarn Bach ac Ysgol Llanbedrog ym mis Ionawr 2020 i drafod yr opsiwn o ffederaleiddio gydag Ysgol Abersoch. Oherwydd natur anffurfiol y trafodaethau hyn, ni chofnodwyd y cyfarfodydd. Roedd y cyfarfod hwn hefyd yn gyfle i ddiweddarau penaethiaid a'r cadeiryddion ynghylch yr opsiynau a drafodwyd yn y cyfarfodydd lleol, gan amlygu unrhyw effaith bosib gallai rhai o'r opsiynau gael ar eu hysgol. Ni fu i unrhyw un o'r ddwy ysgol ddatgan diddordeb mewn ymchwilio ymhellach i fodel ffederal.

- 6.13.21 Noder, er mwyn cael y gorau o fodel ffederal mae'n arferol, ond nid yn rheidrwydd, y byddai'r ysgolion yn rhannu Pennaeth. Gan fod Pennaeth ymhob un o'r ysgolion mae'r Cyngor o'r farn y gall model ffederal mwyaf effeithiol arwain at ddiswyddiadau gorfodol.
- 6.13.22 Er bod manteision i ffederaleiddio, mae'r awdurdod o'r farn y byddai'n annhebygol y byddai'r opsiwn yn cyfarch y prif heriau y mae Ysgol Abersoch yn ei hwynebu megis niferoedd isel, maint dosbarthiadau bychan, ac o ganlyniad, byddai heriau cyllidol yr ysgol yn parhau.
- 6.13.23 Yn dilyn pwyso a mesur rhinweddau a gwendidau'r model, daethpwyd i'r casgliad na fyddai ffederaleiddio yn ddatrysiad cynaliadwy ar gyfer yr ysgol. Nid oes tystiolaeth amlwg y byddai ffederaleiddio yn arwain at gynnydd mewn niferoedd. O ganlyniad felly, pe byddai'r opsiwn yma'n cael ei wireddu, rhagwelir y byddai'r her o niferoedd isel, maint dosbarthiadau bychain, a'r heriau cyllidol y mae'r ysgol yn eu hwynebu yn parhau. Ystyrir felly nad ffederaleiddio yw'r opsiwn gorau ar gyfer sefyllfa'r ysgol.
- 6.13.24 Derbyniwyd dau wrthwynebiad oedd yn argymhell ystyried opsiwn i sefydlu Ysgol Aml-Safle rhwng Ysgol Abersoch, Ysgol Llanbedrog ac Ysgol Sarn Bach.**
- 6.13.25 Yn ystod y cyfarfodydd Adolygu Ysgol Lleol cynigwyd a thrafodwyd nifer o fodelau posibl yn unol â gofynion y Côt Trefniadaeth Ysgolion 011/2018. Yn achos model Ysgol Ardal Aml-safle, mae'r ysgol yn un ysgol ac un endid cyfreithiol sy'n gwasanaethu ardal eang. Fodd bynnag, mae ysgol ardal aml-safle yn rhoi darpariaeth addysgol ar nifer o safleoedd.
- 6.13.26 Budd y math hwn o fodel yw'r gallu i ail-strwythuro'r drefniadaeth reolaethol, tra ar yr un pryd gadw presenoldeb addysg mewn mwy nag un gymuned. Mae'n fodel all weithio'n dda mewn ardaloedd gwledig iawn lle mae pellteroedd teithio hir nes cyrraedd ysgol amgen. Hefyd golyga nad yw safleoedd ysgolion bach yn cael eu gadael yn ynysig ond yn hytrach yn rhan o sefydliad addysg mwy. Gellir felly wneud gwell defnydd o adnoddau e.e. un pennaeth ar gyfer mwy nag un safle, rhannu adnoddau a staff rhwng safleoedd a dod a disgyblion safleoedd at ei gilydd i gynnal gweithgareddau gyda niferoedd uwch o ddisgyblion.
- 6.13.27 Yn dilyn pwyso a mesur rhinweddau a gwendidau'r model, yn dilyn yr ymgynghoriad statudol, daethpwyd i'r casgliad na fyddai Ysgol Aml-safle yn ddatrysiad cynaliadwy ar gyfer yr ysgol. Nid oes tystiolaeth amlwg y byddai'n arwain at gynnydd mewn niferoedd. O ganlyniad felly, pe byddai'r opsiwn yma'n cael ei wireddu, rhagwelir y byddai'r her o niferoedd isel, maint dosbarthiadau bychain, a'r heriau cyllidol y mae'r ysgol yn eu hwynebu yn parhau. Ystyrir felly nad Ysgol Aml-safle yw'r opsiwn gorau ar gyfer sefyllfa'r ysgol.
- 6.13.28 Roedd nifer o wrthwynebiadau yn argymhell datblygiadau posib i'r ysgol e.e. Ysgol Draeth, Canolfan Ddiwylliannol, Addysg Gyflawn ac Adnabod Bro.**
- 6.13.29 Mae'r Cyngor yn nodi'r opsiynau i ddatblygu yr ysgol.
- 6.13.30 Mae Ysgol Abersoch wedi ei blaenoriaethu ar gyfer adolygiad o'r ddarpariaeth addysgol oherwydd bod nifer o heriau yn ei hwynebu. Mae niferoedd disgyblion yr ysgol wedi gostwng yn gyson ers 2016 ac yn fregus ers peth amser. O ganlyniad, mae'n debygol felly bod yr ysgol yn wynebu heriau cynyddol.
- 6.13.31 Cydnabyddir gall yr opsiynau yma wneud defnydd gwell o adeilad yr ysgol. Serch hynny, wrth ystyried opsiynau yn erbyn ffactorau'r Strategaeth Addysg Gynradd o'r Ansawdd Gorau i Blant Gwynedd, deuir i'r casgliad na fyddai'r opsiynau yn llwyddo i gwrdd â, na datrys y prif heriau y mae'r ysgol yn ei wynebu e.e. niferoedd disgyblion isel, maint dosbarthiadau bychain, amrediad oedran eang o fewn dosbarthiadau a chost y pen uchel.

6.13.32 Derbyniwyd rhai gwrthwynebiadau oedd yn cwestiynu pam nad ystyriwyd adolygiad dalgylchol.

6.13.33 Mewn ymateb i'r sylwadau hyn, nodir fod Cabinet y Cyngor, yn ei gyfarfod ar 17 Medi 2019 wedi rhoi caniatâd i'r Adran Addysg gynnal trafodaethau ffurfiol gydag Ysgol Abersoch i alluogi llunio ystod o opsiynau posibl yn ymwneud â dyfodol yr ysgol yn sgil pryderon ynghylch niferoedd disgyblion yr ysgol a phryderon ynglŷn â'r rhagamcanion oedd yn rhagweld y niferoedd yn parhau'n isel.

6.13.34 Mae'r Strategaeth Addysg Gynradd o'r Ansawdd Gorau i Blant Gwynedd yn nodi:

“Dylid ystyried gwybodaeth broffesiynol berthnasol er mwyn tynnu sylw at sefyllfaoedd argyfyngus o fewn y Sir sy'n amharu yn uniongyrchol ar ansawdd addysg a phrofiadau disgyblion (e.e. niferoedd bychan iawn mewn ysgol, cyflwr adeiladau'r ysgol yn hynod ddrwg, methu recriwtio pennaeth).

Bydd sefyllfa argyfyngus ysgolion unigol a amlygir ar sail gwybodaeth broffesiynol berthnasol gan gynnwys ceisiadau penodol gan ysgolion unigol yn ystyriaeth wrth adnabod ardaloedd sydd angen sylw pellach.”

6.13.35 Pwysleisir nad yw'r adolygiad o sefyllfa Ysgol Abersoch yn rhan o strategaeth ehangach ar gyfer addysg yn yr ardal, ond yn hytrach, yn ymateb i sefyllfa argyfyngus ysgol unigol.

6.13.36 Roedd rhai sylwadau yn honni nad oedd opsiynau amgen a godwyd yn ystod yr ymgynghoriad wedi cael eu hystyried yn llawn a'u trafod yn ddigon trwyadl

6.13.37 Mae Côt Trefniadaeth Ysgolion 011/2018, yn nodi y gall ymgynghorai awgrymu opsiynau amgen eraill yn ogystal â sylwadau ar y cynnig penodol yn ystod yr ymgynghoriad.

6.13.38 Cynigwyd 5 opsiwn amgen arall yn ystod yr ymgynghoriad. (Roedd nifer o'r ymatebion yn awgrymu y dylid rhoi ystyriaeth bellach i'r opsiwn i ymestyn ystod oed yr ysgol i 3-9 oed yn ogystal). Serch hynny, yn dilyn gwerthuso'r opsiynau hyn yn erbyn ffactorau'r Strategaeth 'Addysg Gynradd o'r Ansawdd Gorau i Blant Gwynedd' (gan roi ystyriaeth i'r Côt Trefniadaeth Ysgolion, ac ystyriaethau perthnasol eraill) daethpwyd i'r casgliad mai'r cynnig o gau Ysgol Abersoch a darparu lle i holl blant dalgylch Ysgol Abersoch yn Ysgol Sarn Bach oedd yn parhau fel yr opsiwn mwyaf priodol i ymateb i'r heriau sydd yn wynebu'r ysgol (am y rhesymau a nodir yn adran 4.1 a 4.7 o'r adroddiad ar yr ymgynghoriad www.gwynedd.llyw.cymru/moderneiddioaddysg).

6.14 Deddf Llesiant

6.14.1 Derbyniwyd gwrthwynebiad oedd yn nodi nad ystyriwyd saith nod y Ddeddf Llesiant yn llawn.

6.14.2 Mae'r Cyngor wedi ymrwymo i'r egwyddorion o fewn Deddf Llesiant Cenedlaethau'r Dyfodol (2015) er mwyn gwella llesiant economaidd, cymdeithasol, amgylcheddol a diwylliannol cymunedau Gwynedd. Gweledigaeth y Cyngor yw:

“Ein gweledigaeth fel Cyngor yw cefnogi holl bobl Gwynedd i ffynnu ac i fyw bywyd cyflawn yn eu cymuned mewn sir sy'n un o'r siroedd gorau i fyw ynddi.”

6.14.3 Nodwyd yn y ddogfen ymgynghori statudol - yn dilyn ystyriaeth ac asesiad yn unol â gofynion y ddeddf llesiant, ystyriwyd 7 nod y ddeddf llesiant ac amcanion llesiant y Cyngor a deuir i'r casgliad bod y cynnig yn cwrdd â'r gofynion. Bydd y cynnig yn caniatáu i ni ymateb i a diwallu anghenion y plant heddiw, a hefyd cryfhau eu llesiant i'r dyfodol.

6.15 Ôl-ddefnydd Safle

- 6.15.1 Bu i rai gwestiynu lle fydd gweithgareddau cymunedol sy'n cael eu cynnal yn yr ysgol yn cael eu darparu os yw'r ysgol ar gau, yn ogystal, a beth fydd yn digwydd i dir ac adeiladau'r ysgol os yw'r ysgol yn cau? Bu i rai amlygu mai rhodd i'r gymuned oedd y tir a'r adeilad yn ogystal.**
- 6.15.2 Pe gweithredir y cynnig i gau Ysgol Abersoch mae gan y Cyngor bolisi ôl-ddefnydd adeiladau ysgolion a byddai'r polisi hwn yn cael ei ddilyn wrth ystyried dyfodol y safle.
- 6.15.3 Byddai angen i'r Cyngor drafod ac ystyried unrhyw dermau neu gyfyngiadau cyfreithiol rhwymol y gellid dod i rym pe bai safle'r ysgol yn peidio â bod yn safle ar gyfer darpariaeth addysg.
- 6.15.4 Rydym yn ymwybodol fod Cylch Meithrin a Ti a Fi yn cael ei gynnal ar safle'r ysgol. Pe byddai penderfyniad i gau'r ysgol, byddai'n rhaid ystyried opsiynau ar gyfer ôl-ddefnydd yr ysgol, gan ystyried y gweithgareddau sy'n cael eu cynnal yn yr ysgol ar hyn o bryd.
- 6.15.5 Felly, o ran darpariaeth y Cylch Meithrin, pe byddai'r cynnig yn mynd yn ei flaen, mae'r Cyngor yn awyddus i drafod y posibilïadau gyda'r cynrychiolwyr perthnasol. Ymysg y posibilïadau i'w trafod fyddai aros yn y lleoliad presennol, ail-leoli i'r ysgol amgen, neu symud i safle arall ym mhentref Abersoch.

6.16 Dyddiad gweithredu'r cynnig

6.16.1 Derbyniwyd gwrthwynebiadau oedd yn cwestiynu'r bwriad i weithredu'r cynnig yng nghanol blwyddyn ysgol.

- 6.16.2 Er i'r ymgynghoriad gael ei gynnal ar y cynnig i gau Ysgol Abersoch ar 31 Awst 2021 a darparu lle i ddisgyblion yn Ysgol Sarn Bach o 1 Medi 2021, yn dilyn ystyried y sylwadau a dderbyniwyd o'r ymgynghoriad yn datgan pryder am yr amserlen amlinellol yma, penderfynwyd y byddai gohirio gweithredu tan 31 Rhagfyr 2021 yn caniatáu mwy o amser i'r Adran Addysg roi trefniadau yn eu lle er mwyn sicrhau trosglwyddiad esmwyth i ddisgyblion Ysgol Abersoch i Ysgol Sarn Bach.
- 6.16.3 Yn ddarostyngedig ar benderfyniad y Cabinet, rhagwelir bydd hyn yn caniatáu digon o amser i'r Adran Addysg gydweithio gyda'r 2 ysgol i roi'r holl drefniadau angenrheidiol yn eu lle cyn trosglwyddo disgyblion i Ysgol Sarn Bach ddechrau Ionawr 2022.

6.17 Arall

- 6.17.1 Cyflwynodd Merched y Wawr yn eu gwrthwynebiad y dylid ystyried ei egwyddorion "I hybu unrhyw achos er budd merched yng Nghymru, ac yn arbennig i rymuso addysg gyhoeddus ac i hyrwyddo diwylliant Cymreig, addysg a'r celfyddydau yng Nghymru trwy gyfrwng yr iaith Gymraeg" wrth ystyried y cynnig.**
- 6.17.2 Ein disgwyliad yw bod ysgolion cynradd y sir yn cefnogi ac yn gwella'r defnydd o'r iaith Gymraeg fel iaith gymdeithasol ac iaith addysg eu disgyblion.
- 6.17.3 Wrth ddatblygu unrhyw gynigion ynghylch ad-drefnu ysgolion, rhaid rhoi ystyriaeth lawn i'r effaith ar yr iaith Gymraeg. Mae cynnal a gwella'r defnydd o'r iaith Gymraeg fel iaith gymdeithasol ac iaith addysg bob amser yn ystyriaeth allweddol wrth lunio cynigion ac wrth asesu dewisiadau.
- 6.17.4 Yn unol â gofynion y Côt Trefniadaeth Ysgolion 011/2018, cwblhawyd asesiad o ardrawiad ieithyddol y cynnig i gau Ysgol Abersoch ac addysgu'r disgyblion yn Ysgol Sarn Bach. Mae'r asesiad ar gael ar wefan y Cyngor www.gwynedd.llyw.cymru/moderneiddioaddysg
- 6.17.5 Deuir i gasgliad yn yr asesiad hwn, na ragwelir effaith negyddol ar yr iaith Gymraeg pe byddai'r cynnig yn cael ei weithredu. Mae hyn yn bennaf gan fod yr ysgol amgen yn cynnig addysg trwy gyfrwng y Gymraeg, fel sydd yn cael ei gynnig yn Ysgol Abersoch ar hyn o bryd. Yr un yw'r Polisi Iaith ar gyfer holl ysgolion

cynradd Gwynedd, felly'r un fyddai'r ddarpariaeth i'r disgyblion waeth pa ysgol y byddent yn dewis mynychu.

6.17.6 Nododd eraill ei fod yn fanteisiol i blant gael eu haddysgu yn agos i adref

6.17.7 Pe gweithredir y cynnig, byddai plant y dalgylch yn cael cynnig addysg o ansawdd uchel yn Ysgol Sarn Bach sydd 1.4 milltir i ffwrdd o bentref Abersoch.

6.17.8 Roedd rhai yn nodi fod Plwyf Llanengan yn cyfrannu dros 4% o'r dreth a gesglir yng Ngwynedd ac y gellid dyrannu cyfran fach o'r arian a gynhyrchir gan yr ail gartrefi hyn i gefnogi ysgol y pentref.

6.17.9 Mae'r Cyngor yn nodi'r sylwadau/gwrthwynebiadau ac yn nodi fod yr ysgol yn derbyn cyllid ychwanegol i'r dyraniad arferol trwy'r polisi lleiafswm staffio (sy'n gwarantu o leiaf pennaeth ac athro ym mhob ysgol, a phennaeth a chymhorthydd mewn ysgolion sydd â llai na 15 o ddisgyblion llawn amser). Cyfanswm y cyllid ychwanegol hwn ar gyfer y flwyddyn ariannol 2020-21 (seiliedig ar niferoedd Medi 2019) yw £52,582. Cost fesul disgybl yn Ysgol Abersoch yw £17,404 (2020-21), gyda chyfartaledd sirol cost fesul disgybl yn £4,198. Nid yw hyn yn gynaliadwy yn y tymor hir oherwydd bod rhagamcanion niferoedd yn parhau yn isel ac o ganlyniad byddai'r heriau cyllidol yn parhau.

6.17.10 Bu i un gwrthwynebydd nodi anfodlonrwydd nad oedd unrhyw sôn yn yr adroddiad am y 150 o swyddi newydd pan fydd gwesty'n cael ei adeiladu a'i agor yn Abersoch, gan annog teuluoedd lleol i aros yn yr ardal a chreu cyfle i deuluoedd newydd ddod i'r ardal.

6.17.11 Mewn ymateb, nodir nad oes sicrwydd y byddai newidiadau demograffig i'r dyfodol a chynnydd yn nifer y swyddi'n lleol yn cynyddu niferoedd disgyblion Ysgol Abersoch. Byddai plant y dalgylch yn cael cynnig addysg o ansawdd uchel yn Ysgol Sarn Bach sydd 1.4 milltir i ffwrdd o bentref Abersoch.

6.17.12 Derbyniwyd rhai gwrthwynebiadau oedd yn cwestiynu penderfyniadau pwyllgorau Cyngor Gwynedd, ac yn cwestiynu a fydd gwrandawriad teg yn cael ei gynnal yn achos Ysgol Abersoch

6.17.13 Galwyd penderfyniad a wnaed gan y Cabinet ar 15 Medi 2020 i mewn i'w graffu gan y Pwyllgor Craffu Addysg ac Economi. Yn ei gyfarfod ar 8 Hydref 2020, rhoddodd y pwyllgor ystyriaeth i benderfyniad Cabinet y Cyngor i gynnal ymgynghoriad statudol ar y cynnig arfaethedig i gau Ysgol Abersoch ar 31 Awst 2021, a darparu lle i ddisgyblion yn Ysgol Sarn Bach a'r 1 Medi 2021.

6.17.14 Yn dilyn ystyriaeth fanwl, penderfynodd y Pwyllgor ei fod yn parhau i bryderu am y sefyllfa ac y dylid cyfeirio'r mater yn ôl i'r Cabinet i'w ail-ystyried.

6.17.15 Yn dilyn ystyriaeth ofalus a thrafodaeth fanwl o farn y Pwyllgor Craffu yn ei gyfarfod ar 3 Tachwedd 2020, penderfynodd Cabinet y Cyngor, na ddylid addasu ei benderfyniad gwreiddiol a wnaethpwyd ar 15 Medi 2020 i gynnal ymgynghoriad statudol ar y cynnig arfaethedig, a mabwysiadu hyn fel y penderfyniad terfynol.

6.17.16 Derbyniwyd nifer o sylwadau yn nodi'r broblem ail-gartrefi sydd yn Abersoch a'r effaith mae hyn wedi ei gael ar yr ysgol. Yn ogystal, derbyniwyd nifer o sylwadau yn nodi mai un o'r rhesymau nad yw nifer y disgyblion wedi codi dros y blynyddoedd diwethaf yw'r diffyg tai fforddiadwy.

6.17.17 *Mae'r Cyngor yn nodi'r sylwadau/gwrthwynebiadau, fodd bynnag, dymuna'r Cyngor nodi nad oes ganddo reolaeth dros y farchnad dai agored.* Ym mis Rhagfyr 2020 fe wnaeth Cyngor Gwynedd fabwysiadu Cynllun Gweithredu a fydd yn buddsoddi £77m mewn dros 30 o gynlluniau penodol i daclo'r her gynyddol o ddiffyg tai addas i drigolion y Sir, gan gynnwys cynyddu'r nifer o dai fforddiadwy fydd ar gael i bobl leol. Caiff y Cynllun ei weithredu dros y 6 mlynedd nesaf gan gynnwys prosiectau megis cynyddu'r nifer o dai cymdeithasol yng Ngwynedd; prynu cyn-dai cymdeithasol a thai preifat i'w gosod ar rent

fforddiadwy i drigolion Gwynedd; datblygu ein tai ein hunain er mwyn cynyddu'r cyfleoedd i drigolion Gwynedd gystadlu; gwrthod ceisiadau i godi amod person lleol ar gyn "dai Cyngor"; Cynllun Cymorth Prynu a Grantiau Prynwyr Tro Cyntaf i adnewyddu tai gwag. Mae union leoliadau rhai o'r cynlluniau hyn i'w cadarnhau yn dilyn ymarferiad o ymgynghori gyda chymunedau er mwyn sefydlu eu hanghenion tai.

6.17.18 Mae'r Cyngor yn ymwybodol y bydd angen cyfres o fesurau, nifer ohonynt tu hwnt i reolaeth uniongyrchol y Cyngor ar hyn o bryd, os am allu sicrhau gwir degwch i drigolion lleol yn y maes tai. Mae'r Cynllun Gweithredu Tai yn un o'r mesurau hyn ac yn caniatáu i ni anelu i weithredu i'r eithaf o'n gallu uniongyrchol er mwyn ceisio unioni'r sefyllfa bresennol. Rydym hefyd yn cydnabod y byddwn angen parhau i ymgyrchu am newidiadau pellach cenedlaethol er mwyn cryfhau ein gallu i weithredu o fewn Gwynedd a bydd y Cyngor yn parhau i wneud hynny ar bob cyfle posib yn y maes tai, trethiant, trwyddedu a chynllunio.

7. ASESIAU EFFAITH

- 7.1 Cynhaliwyd nifer o asesiadau effaith yn unol â gofynion y Côt Trefniadaeth Ysgolion 011/2018 gan gynnwys:
- *Asesiad o'r Effaith debygol ar wahanol drefniadau teithio*
 - *Asesiad o'r Effaith debygol ar y gymuned*
 - *Asesiad o'r effaith debygol ar ansawdd a safonau addysg*
- 7.2 Yn dilyn y cyfnod ymgynghori, yn unol â gofynion Cod Trefniadaeth Ysgolion 011/2018, cwblhawyd asesiad pellach o'r cynnig a phob un o'r opsiynau amgen a ystyriwyd, ac fe gafwyd eu cynnwys fel atodiad i'r adroddiad a gyflwynwyd i'r Cabinet ar 15 Mehefin 2021. Gellir gweld copi o'r asesiad llawn ar wefan y Cyngor www.gwynedd.llyw.cymru/moderneiddioaddysg
- 7.3 Nodir casgliadau'r asesiad o'r effaith debygol ar wahanol drefniadau teithio y byddai'r opsiwn o gau'r ysgol yn golygu fod angen i ddisgyblion Ysgol Abersoch deithio yn bellach i'w hysgol bob dydd. Mae Ysgol Sarn Bach wedi ei lleoli 1.4 milltir o Ysgol Abersoch, a rhagwelir fod y daith oddeutu 5 munud bob ffordd mewn car neu fws, sydd o fewn y pellter rhesymol y disgwylir i blant cynradd ei deithio i'w hysgol yn unol â'r 'Strategaeth Addysg Gynradd o'r Ansawdd Gorau i blant Gwynedd' o 30 munud bob ffordd. Bydd cludiant i'r ysgol amgen yn cael ei gynnig yn unol â pholisi cludiant Cyngor Gwynedd.
- 7.4 Yn ogystal, nodir asesiad o'r effaith debygol ar y gymuned y byddai peth effaith negyddol o ran cau'r ysgol. Yn ogystal, nodir bod nifer fawr o ymatebion i'r ymgynghoriad wedi pwysleisio y byddai'r cynnig i gau'r ysgol yn cael effaith negyddol ar y pentref a'r gymuned leol. Serch hynny, nodir awdurdod fod 35% o'r disgyblion (M-B1.3) sydd yn byw yn nalgylch Ysgol Abersoch eisoes yn mynychu Ysgol Sarn Bach, ac o ganlyniad, deuir i'r casgliad fod cysylltiad rhwng yr ysgol a'r ardal ehangach eisoes yn bodoli. I liniaru unrhyw effaith negyddol posib ar y gymuned pe gweithredir y cynnig, mae'r asesiad yn nodi pwysigrwydd sicrhau fod cymuned Abersoch yn cael eu cynnwys yng ngweithgarwch yr ysgol amgen, ac i annog cydweithio cymunedol rhwng yr ysgol amgen a chymuned Abersoch, lle'n briodol.
- 7.5 Yn asesiad o'r effaith debygol ar ansawdd a safonau addysg, deuir i'r casgliad fod safon yr addysg yn Ysgol Sarn Bach ar yr un lefel â safon yr addysg yn Ysgol Abersoch. O ganlyniad felly, ni ragwelir y byddai unrhyw effaith negyddol o safbwynt ansawdd a safonau addysg yn deillio o'r cynnig i gau Ysgol Abersoch a throsglwyddo disgyblion i Ysgol Sarn Bach.

- 7.6 Y mae'r Adran Addysg yn parhau i fod o'r farn, a hynny ar ôl cynnal y cyfnod gwrthwynebu, na fyddai'r un o'r opsiynau eraill, gan gynnwys ffederaleiddio, ac ymestyn ystod oed yr ysgol yn mynd i'r afael a'r prif heriau sydd yn wynebu'r ysgol sef
- niferoedd isel o ddisgyblion
 - rhagamcanion yn dangos gostyngiad pellach dros y pum mlynedd nesaf,
 - disgyblion presennol yn cael eu haddysgu mewn dosbarthiadau sydd yn fychan mewn niferoedd gydag ystod oed eang o fewn y dosbarthiadau hynny.

8. YSTYRIAETHAU PELLACH

- 8.1 Yn ogystal â'r asesiadau effaith a nodwyd uchod, cynhaliwyd a diweddarwyd nifer o asesiadau effaith eraill yn ystod y broses. Cynhwysir yr asesiadau hyn fel atodiad i'r adroddiad hwn (**Atodiad C**) ac i'r adroddiad gyflwynwyd i'r Cabinet ar 15 Mehefin 2021 a chrynoir eu casgliadau isod.
- 8.2 Asesiad Llesiant (Deddf Llesiant Cenedlaethau'r Dyfodol 2015)**
- 8.2.1 Yn dilyn ystyriaeth ac asesiad yn unol â gofynion Deddf Llesiant Cenedlaethau'r Dyfodol (2015), ystyriwyd 7 nod y ddeddf Llesiant ac amcanion Llesiant y Cyngor a deuir i'r casgliad fod y cynnig yn cwrdd â'r gofynion. Bydd y cynnig hwn yn caniatáu i'r Cyngor ymateb i a diwallu anghenion y plant heddiw, a hefyd cryfhau eu Llesiant i'r dyfodol.
- 8.2.2 Cydnabyddir, pe byddai'r Cabinet yn penderfynu symud ymlaen gyda'r cynnig hwn, gall arwain at gau ysgol yng nghymuned Abersoch, fodd bynnag mae nifer helaeth o'r plant sy'n byw o fewn dalgylch yr ysgol eisoes yn mynychu ysgolion eraill, gan gynnwys yr ysgol amgen, ac felly mae cyswllt rhwng Ysgol Sarn Bach a chymuned Abersoch eisoes. Bydd pob ymdrech yn cael ei wneud i liniaru'r effaith ar y gymuned drwy annog cysylltiadau rhwng y cymunedau. Pe byddai'r cynnig yn cael ei gymeradwyo, bydd trafodaethau yn cael eu cynnal er mwyn trafod y posibilrwydd fod gweithgarwch cymunedol Ysgol Sarn Bach yn cynnwys cymuned Abersoch, lle'n briodol.
- 8.2.3 Bydd y cynnig arfaethedig yn sicrhau fod plant yr ardal yn cael eu haddysgu ar safle sy'n addas ac mewn cymdeithas naturiol Gymraeg, gan gynyddu cyfleoedd i gymdeithasu a chydweithio gydag eraill a rhoi cyfle teg iddynt ffynnu ymysg eu cyfoedion. Gellir gweld yr asesiadau llawn yn **Atodiad C**.
- 8.3 Asesiad Cydraddoldeb**
- 8.3.1 Mae polisiâu a threfniadau mewn lle a fyddai yn sicrhau fod y cynnig yn ystyried ac yn cyd-fynd ag hawliau cyfartal.
- 8.3.2 Cynhaliwyd asesiad cydraddoldeb ar yr opsiynau, sydd yn rhoi sylw i elfennau cydraddoldeb gwahanol megis hil, rhyw, anabledd, iaith, crefydd neu gred ac oedran.
- 8.3.3 Bu i'r asesiad cydraddoldeb nodi pwysigrwydd hyrwyddo cyfleoedd cyfartal yn gadarnhaol yn sgil y cynnig a bod mesurau mewn lle i sicrhau na fydd camwahaniaethu anghyfreithiol ac aflonyddu. Mae trefniadau mewn lle yn ogystal fydd yn monitro ac yn adolygu'r sefyllfa. Gellir gweld yr asesiadau llawn yn **Atodiad C**.
- 8.4 Asesiad Ardrowiad Ieithyddol**
- 8.4.1 Ni ragwelir y byddai'r cynnig i gau Ysgol Abersoch a chynnig lle i'r disgyblion yn Ysgol Sarn Bach yn cael effaith negyddol ar allu ieithyddol y plant. Byddai'r opsiwn yn golygu fod disgyblion Ysgol Abersoch yn

parhau i gael eu haddysgu mewn ysgol cyfrwng Cymraeg. Nodir fod canran uwch o ddisgyblion yn dod o gartrefi sydd yn gallu siarad Cymraeg yn Ysgol Sarn Bach (57%), o'i gymharu ag Ysgol Abersoch (33%). Wrth drosglwyddo disgyblion Ysgol Abersoch i Ysgol Sarn Bach, rhagwelir y byddai'r canran o ddisgyblion sydd yn dod o gartrefi Cymraeg oddeutu 54%. Ar sail hynny, rhagwelir y byddai mwy o gyfleoedd i ddisgyblion Abersoch ddefnyddio'r Gymraeg yn anffurfiol gyda'u cyfoedion tu mewn a thu allan i'r dosbarth, ac y byddai lefel bywiogrwydd y Gymraeg a'r defnydd anffurfiol o'r iaith yn gryfach. Mae Ysgol Abersoch wedi gweithio'n galed i ddatblygu sgiliau dwyieithog y plant a hyrwyddo pwysigrwydd y diwylliant Cymraeg. Mae'n bwysig felly bod y cynnig i symud y plant yn cydnabod yr angen i gefnogi a pharhau gyda'r gwaith hwn.

9. CASGLIAD

- 9.1 Er i'r awdurdod dderbyn cyfanswm o 211 o wrthwynebiadau a 2 ddeiseb yn ystod y cyfnod gwrthwynebu, yn dilyn ystyried yr holl wrthwynebiadau a dderbyniwyd, mae'r Cyngor yn parhau i fod yn argyhoeddedig mai'r cynnig hwn yw'r ymateb mwyaf priodol i'r prif heriau y mae'r ysgol yn ei wynebu.
- 9.2 Mae dadansoddiad o'r sylwadau a'r gwrthwynebiadau a dderbyniwyd yn cael sylw yn *Adran 6* o'r adroddiad yma ac mae'r ymatebion ar gael yn llawn yn **Atodiad A**.
- 9.3 Rhagwelir y bydd y cynnig i gau Ysgol Abersoch a chynnig lle i'r disgyblion yn Ysgol Sarn Bach yn ymateb i'r heriau sydd yn wynebu Ysgol Abersoch (amlinellir yn adran 3.2) ac yn arwain at gyfleoedd mwy cyson i blant y dalgylch, drwy anelu at ddyheadau strategol Cyngor Gwynedd i '*gynnig addysg o'r ansawdd uchaf posibl fydd yn rhoi'r profiadau, y sgiliau a'r hyder i blant y Sir a'u galluogi i ddatblygu i fod yn ddinasyddion dwyieithog, llwyddiannus a chyflawn*'. Byddai hyn yn cyd-fynd â thargedau Strategaeth 'Addysg Gynradd o'r Ansawdd Gorau i Blant Gwynedd' :
- Maint Dosbarthiadau (ac amrediad oedran) - disgyblion i gael eu haddysgu mewn dosbarthiadau o faint mwy addas na'r sefyllfa bresennol. Byddai gweithredu'r cynnig yn arwain at well cysondeb mewn maint dosbarthiadau a lleihau'r ystod oedran o fewn dosbarthiadau ysgolion cynradd yr ardal.
 - Poblogaeth a Niferoedd disgyblion - disgyblion i gael eu haddysgu mewn ysgol ble mae'r niferoedd a rhagamcanion yn fwy cadarn a chynaliadwy ar gyfer y dyfodol, a lleihau'r gyfradd o lefydd gweigion yn ysgolion yr ardal.
 - Arweinyddiaeth - arweinyddiaeth a rheolaeth gadarn mewn ysgol sydd â niferoedd yn caniatáu i Bennaeth gael tegwch i arwain a rheoli yn broffesiynol yn yr ysgol.
 - Y Gymuned – I liniaru unrhyw effaith negyddol posib ar y gymuned pe byddai'r cynnig yn cael ei wireddu, mae'r asesiad yn nodi pwysigrwydd sicrhau y byddai cymuned Abersoch yn cael eu cynnwys yng ngweithgarwch yr ysgol amgen, ac i annog cydweithio cymunedol rhwng yr ysgol amgen a chymuned Abersoch.
 - Adnoddau Ariannol - Rhesymoli cost fesul disgybl mewn ysgolion a fyddai'n lleihau'r amrediad mewn cost y disgybl i holl blant Gwynedd. Amcangyfrifir y bydd gwireddu'r cynnig yn arwain at gost fesul disgybl o £4,683 yn Ysgol Sarn Bach o gymharu â'r £17,404 y disgybl presennol yn Ysgol Abersoch. Y cyfartaledd sirol ar gyfer yr un cyfnod yw £4,198 y disgybl. Amcangyfrifir y byddai'r cynnig arfaethedig yn creu arbediad blynyddol o £110,062, llai costau anghenion cludiant ychwanegol (£14,000) – sef oddeutu £96,062 y flwyddyn.
 - Yr Iaith Gymraeg – disgyblion i gael eu haddysgu mewn ysgol cyfrwng Cymraeg, fel y sefyllfa bresennol, ac mewn ysgol ble mae defnydd cymdeithasol o'r Gymraeg yn gryf.
 - Ffactorau Daearyddol - byddai'r disgyblion yn parhau i dderbyn eu haddysg mewn ysgol o fewn pellter rhesymol i'w cartrefi ac yn derbyn cludiant yn unol â pholisi'r Cyngor.

10. ARGYMHELLIAD

- 10.1 Yn dilyn ystyried y gwrthwynebiadau a'r sylwadau a dderbyniwyd, argymhellir i'r Cabinet gymeradwyo yn derfynol y cynnig a roddwyd drwy rybudd statudol, i gau Ysgol Abersoch ar 31 Rhagfyr 2021 a darparu lle l'r disgyblion yn Ysgol Sarn Bach o 1 Ionawr 2022, yn unol ag Adran 53 o'r Ddeddf Safonau a Threfniadaeth Ysgolion (Cymru) 2013 a gofynion y Côt Trefniadaeth Ysgolion 11/2018.

11. CAMAU NESAF

- 11.1 Yn dilyn penderfyniad terfynol y Cabinet, yn unol ag adran 54 o'r Ddeddf 2013, gall y cyrff canlynol at-gyfeirio'r cynnig, cyn pen 28 diwrnod o ddiwrnod y penderfyniad, i Weinidogion Cymru ei ystyried:
- i. Awdurdod lleol arall y mae'r cynigion yn effeithio arno;
 - ii. Y corff crefyddol priodol ar gyfer unrhyw ysgol yr effeithir arni;
 - iii. Corff llywodraethu ysgol wirfoddol neu sefydledig sy'n destun cynigion;
 - iv. Ymddiriedolaeth sy'n dal eiddo ar ran ysgol wirfoddol neu sefydledig sy'n destun cynigion;
 - v. Sefydliad addysg bellach y mae'r cynigion yn effeithio arni.
- 11.2 Bydd angen i'r corff sy'n at-gyfeirio nodi pam eu bod yn credu bod y penderfyniad a wnaeth yr awdurdod lleol yn anghywir. Bydd Gweinidogion Cymru yn penderfynu a ydy'r cynigion yn effeithio ar y cyrff ac a oes angen iddynt ystyried y cynigion.
- 11.3 Pe byddai'r Cabinet yn penderfynu'n derfynol i gweithredu'r cynnig, ac os na fyddai'r cynnig yn cael ei at-gyfeirio, amlinellir y camau nesaf a'r amserlen isod:

Tachwedd – Rhagfyr 2021	<p>Adran Addysg i gydweithio gyda'r 2 ysgol i roi'r holl drefniadau angenrheidiol yn eu lle cyn trosglwyddo disgyblion i Ysgol Sarn Bach ddechrau Ionawr 2022.</p> <p>Gwasanaeth Adnoddau Dynol i ddilyn prosesau penodol gyda staff yr ysgol yn unol â chyfraith cyflogaeth.</p>
31 Rhagfyr 2021	<p>Gweithredu'r cynnig: Ysgol Abersoch yn cau yn swyddogol, yn ddarostyngedig i benderfyniad y Cabinet.</p>

12. BARN Y SWYDDOGION STATUDOL

Y Swyddog Monitro:

Mae'r adroddiad yma wedi bod yn destun cyngor gan y Gwasanaeth Cyfreithiol dim sylwadau l'w hychwanegu o safbwynt priodoldeb

Y Pennaeth Cyllid:

Cadarnhaf fod y ffigyrau ariannol sydd yn rhan 3.3 (v) a (vi), 6.12, 6.13, 6.17 a 9 o'r adroddiad, ac hefyd y ffigyrau yn ymateb Cyngor Gwynedd o fewn Rhan (Ng) o Atodiad A, yn adlewyrchu gwir gost neu amcangyfrif teg (lle'n briodol) wedi ystyried cost cludiant.

Mae rhesymau amlwg yn cefnogi'r cynnig i gau Ysgol Abersoch ar 31 Rhagfyr 2021, gan gynnwys rhesymau ariannol fel arbediad blynyddol o £96,062 mewn costau refeniw, a chost y disgybl o £17,404 yn Ysgol Abersoch o'i gymharu â chyfartaledd sirol o £4,198. Felly, rwy'n cefnogi'r argymhelliad.

Yr Aelod Lleol:

"... mae fy ymateb dyddiedig 22/07/21 sydd yn gwrthwynebu cau yr ysgol a mae y rhesymau ar sylwadau sydd yn dal mor perthnasol a nid oes dim wedi newid.

Yn ychwanegol ir adroddiad sydd yn pwysleisio yr effaith negyddol ar yr Iaith a diwylliant Cymraeg yn y pentref – yr effaith negyddol ar addysg y plant. Yr colled o adnodd hanesyddol o bwysig ir pentref a mor bwysig mewn llawer ffordd ir ardal hoffwn rhoi sylwadau yma ymlaen.

Yn ddiweddar rwyf wedi derbyn gwybodaeth gan yr Adran Tai ac Eiddio fod yna edrych ar datblygiad o codi tai yn y pentref a fod cymdeithas tai sydd yn barod yn berchen ar tir a sydd yn gorwedd oddi fewn ir ffin datblygu yn obeithiol drwy cais grant Llywodraeth Cymru i codi cartrefi i bobl lleol.

Mae yn amlwg pam fydd y datblygiad yma yn dod i rîm ni fydd adnoddau addysg yr ardal yn cyfarch ar gofynion – nid oes gair oddi fewn ir adroddiad ynglŷn ar gallu i ymateb i fath yma o datblygiad. Mae rhaid adnabod fod capasiti ysgolion yr ardal yn orlawn ac nid yw y gallu yma i dderbyn fwy o blant.

Yn ddiweddar roeddwn yn gwrandao ar y Pwyllgor Cynllunio yn trafod codi 12 tŷ yn ardal Penygroes a fod y gofyn yn lleol am y fath yma o ddatblygiad rhan cartrefi ein pobol. Un or pryderon gafodd ei godi oedd capasiti ysgolion lleol i dderbyn plant a fydd yn debyg i fod drwy datblygiad fel hyn.

Mae hun yn amlygu y ffaith fod adnoddau oddi fewn i cymdeithas yn llwyr bwysig ran y cynlluniau sydd o phosib yn dod ir golwg ac yn wir fel sydd yn yr achos yma mae Ysgolion yn llwyr bwysig rhan or cynllun ar uchelgais o cartrefi ein pobol lleol. Mae y penderfyniad yma yn llwyr groes ir cynlluniau ar uchelgais y Cyngor.

Mae rhaid ddweud fod y penderfyniad o gau yr Ysgol yn un annoeth ond i gau yr ysgol yn ganol Blwyddyn yr Ysgol a symud plan t i ysgol arall yn hollol groes i synnwyr cyffredin ac am cael effaith negyddol ar addysg y plant, os bydd cau pam ddim gohirio hyn dan diwedd y flwyddyn Ysgol.

Siomedig yw fy mod eto yn y sefyllfa o gorfod ymateb i adroddiad oddi fewn i ddau ddiwrnod er fy mod wedi cwyno yn y gorffennol fod hyn yn annheg rhan rhoi amser priodol i mi cael cyfathrebu gyda Llywodraethwyr Rhieni ar cymdeithas yn gyfan bron fod rhywun yn gallu dod ir canlyniad fod hyn yn fwriadol oherwydd fod hyn wedi digwydd tro ar ôl tro yn ystod y broses

Oherwydd y rhesymau hyn ofynnaf ir Cabinet ail ystyried ei penderfyniad a cadw yr adnodd yma yn agored neu beth bynnag dan fod yr Flwyddyn Ysgol wedi darfod."

Atodiadau:

Atodiad A: Dadansoddiad o sylwadau gwrthwynebu

Atodiad B: Rhybudd statudol

Atodiad C: Aseidiadau Cydraddoldeb a Llesiant

DOGFENNAU CEFNDIR – Gellir weld holl ddogfennau cefndir perthnasol y cynnig ar wefan y Cyngor trwy ddilyn y ddolen www.gwynedd.llyw.cymru/moderneiddioaddysg